

毛

詩

多

識

毛詩多識卷九

長白多隆阿著

小雅中

鶴鳴于九臯聲聞于野

鶴水鳥博物志云鶴骸頰龍耳響則聽遠眼赤則眎遠其色似雪相鶴經云鶴陽鳥也而遊於陰行必集洲渚止不集林木蓋鶴最善鳴故此詩言鶴鳴易云鳴鶴在陰其子和之是亦以鳴言鶴也陸氏疏引淮南子云雞知將旦鶴知夜半是言鶴之鳴多在夜也鶴性易馴近爲人家常畜形如家鵝而不瘦肥高二尺餘項長等身丹頂赤目烏帶周頸青足高翹白羽黑翼今見斂翼之鶴其翼端黑翎皆聚於尾往往誤以鶴爲黑尾者而其實非尾之黑蘇子瞻後赤壁賦言鶴爲元裳縞衣是猶未細察也鶴之氣通任脈與鹿之氣通督脈同故二物皆壽長生不死鶴羽純白故名白鶴亦有蒼羽者俗呼灰鶴聲

清而高恆聞數里故毛傳云澤皋也言身隱而名著也埤雅云鶴形定而色白食於水故喙長軒於前故後短棲於陸故足高而尾凋翔於雲故毛豐而肉疎大喉以吐故修頸以納新故壽李氏本草言鶴雄鳴上風雌鳴下風聲交而孕好食魚尤喜啖虺蛇蛇聞其聲不敢行鶴頂羽作肉珠色白食蛇久則色漸紅老則鮮如珊瑚俗云蛇之毒咸聚於鶴頂也是鶴之品清異於鶴之頂毒同於鳩也崔氏古今注云鶴千年則變蒼又二千年則變黑所謂元鶴也古謂之仙禽亦名露禽或又謂之陰羽

園有樹檀其下維穀

檀木名孔疏云善木也見將仲子

園有樹檀其下維穀

毛傳云穀惡木也陸疏云穀幽州人謂之穀桑或曰楮莉揚交廣謂之穀中州人謂之楮殷中宗時桑穀共生是也今江南績其皮以爲

布又擣以爲紙其葉初生可以爲茹詩緝云穀楮也今楮皮也夫以
穀皮造紙今猶盛行呼曰桑皮紙穀有楮名又楮紙實名楮實子本
草言楮實益氣充饑輕身不老入藥上品而傳乃曰惡木者則以穀
對檀言穀無大木不若檀爲大材也說文楮穀兩字互訓楮穀自是
一物埤雅云皮白者穀皮斑者楮雖爲一物而皮色小別爾雅翼云
葉無瓣曰構是穀葉多碎如花之瓣葉整名構也李氏本草云穀分
雌雄雄者皮白而葉有棱枝開碎花結實如楊梅蜜煎可作果食高氏天
祿識餘云穀音構木名皮可爲紙王右軍傳云禿千兔之翰聚無一
毫之筋窮萬穀之皮斂無半分之骨蓋穀卽山桑有結實不結實之
異葉亦有整碎之分其整者葉大而厚花作穗春老穗落其實百不
存一其葉碎者小而薄結實纍纍盈枝紅酸黑甘可充果食其似柳
花者落不成實其結實爲椹者亦不開花桑椹初結數十子相黏爲

一每粒端各有細毛彷彿似花而非花也關左植桑養蠶近海處多留心驗之則知李氏考據尙微疎耳

皎皎白駒食我場藿

毛傳云藿猶苗也詩緝云藿豆葉也古人以藜藿充食品藿即豆之葉說文藿作蘿釋云菜之少也儀禮云牛藿注云豆葉

黃鳥黃鳥無集于穀無啄我粟

黃鳥黃鸝也見葛覃穀桑穀也見鶴鳴粟穀名王氏羣芳譜云粟米之連殼者本五穀中之一粱屬也北方直名之曰穀今因之脫殼則爲粟米亦曰小米粟古文作稟象穗在禾上之形_言粱之細者稈高三四尺似蜀黍稈中空有節葉似蘆小有毛穗似蒲亦有毛顆粒成簇性鹹淡養脾胃陳者尤良北人日用不可缺者此穀關左種者尤多呼曰穀子無稱粟者莖高有節一節一葉穗似狼尾草曲而下垂種於膏土則穗長尺餘數百粒聚成小穗密黏於穗每穗凡數十穗

實似黍而小不黏稃米俱黃色性畏澆不宜下濕地連殼收藏年久
不蠹首燕高田皆宜此穀洵美種也

黃鳥黃鳥無集于桑無啄我粱

桑木名見定之方中粱穀名舊注皆以爲粟然首章已言粟此章不
應重出有重出者亦不宜栗粱易字粱疑是今之高粱名蜀黍又名
紅粱見鵠羽

黃鳥黃鳥無集于栩無啄我黍

栩木名見鵠栩黍穀名見黍離

我行其野蔽芾其樗

毛傳云樗惡木也孔疏云七月言采荼薪樗樗唯取薪薪惡木也蓋
樗非美材俗呼爲臭椿其味臭故云惡不似香椿可采食也又名野
樗與樗同類陸疏云山樗與下田樗略無異葉似差狹山樗卽樗下
田樗卽野樗樗非良材人無植者自生自長行野者遇此得其陰蔭

以起下婚姻之故素有恩義非野樗比而乃不我庇不如此樗也唐本草云椿樗二樹形相似樗木疎椿木實蘇氏圖經云椿葉香可啖樗氣臭北人呼曰山椿江東呼爲鬼目椿樗二木處處有之椿嫩葉香美鹽漬爲蔬可入食品樗葉味臭其木雖大而皮粗質虛削之如朽莊子云吾有大樹人謂之樗其大本擁腫而不中繩墨其小枝卷曲而不中規矩則樗洵不材矣

我行其野言采其蓬

毛傳云蓬惡菜也是言蓬爲菜而蓬實爲隰草不可食處處皆有春生苗葉狹長一二尺似牛舌莖高三四尺餘色青節間微赤夏初起薹開青白花成穗結子三稜外皮大於蕎麥而實小夏至後卽枯關左俗呼曰羊蹄葉鄭箋云蓬牛穎仲春時生可采也爾雅釋草云蕡牛穎郭注云今江東呼爲牛穎者高尺餘許方莖葉長而銳有穗穗間有華華紫縹色陸疏云蓬牛穎似蕡菔而莖赤多啖令人下氣此

所言正爲今之羊蹄形色同性亦同也夫傳以蘧爲菜箋則言其可采是爲食物矣然羊蹄味苦有小毒本草言其可制鉛汞療疥癬治禿瘡故此草又有禿菜名味薰臭根名野大黃焙成炭食之猶鴻獸醫取此用治牛馬熱結屢效春苗嫩時其毒未發或可采以代蔬部晉書爾雅正義言車前草一名牛薦又以爲天麻又以爲紫華益母總由不識此草再三亂猜終無一是陸氏言此草最得大意郭注言其方莖紫華似益母不知羊蹄莖有七八稜而圓花似酸模無紫色者傳以爲惡菜味臭有毒俱可以一惡字括之子名金蕎麥亦不可食俗或采之以裝枕囊言治耳聾鄭樵以蘧爲菲菲根可爲蔬蘧根不可爲蔬也亦誤

我行其野言采其蘧

毛傳云薔惡菜也鄭箋云薔薔也爾雅釋薔有二一曰薔薔一曰薑茅郭注云薔大葉白華根如指正白可啖薔華有赤者爲夏薑薔

一種耳陸疏言葛亦有一其言莖葉細而香者卽爾雅之葛蕕也其
言赤莖而臭者卽雅爾之蕷茅也齊民要術云河東漢中謂之葛幽
堯謂之蒸蕕一名蕕卉一名蔓根根正白著熟灰中煮啜之飢荒可
以禦飢漢祭甘泉或用之夫蕕博雅名楚蕷說文名茆葛其可食者
卽箋所言之萬蕕其赤莖者卽傳所言之惡菜離騷云索蕷茅以筵
筆注云香草與爾雅所言之蕷茅異非此詩所言之蕕也蕕名旋花
又名鼓子花

如竹苞矣如松茂矣

竹草名見竹竿松木名見山有扶蘇

鳥鼠攸去

鼠獸之小者見行露

如翬斯飛

翬雉也鄭箋云伊洛而南素質五采皆備成章曰翬此與爾雅說文

俱同郭注云翟亦雉屬言其毛色光鮮左氏昭公十七年傳五雉注雉有五種伊洛之南曰翠雉

吉夢維何維熊維熊維虺維蛇

鄭箋云熊羆之獸虺蛇之蟲此四者夢之吉祥也熊羆在山陽之祥故爲生男虺蛇穴處陰之祥故爲生女蓋熊羆皆山獸本草謂熊羆爲一類熊爲猪熊羆爲馬熊是名熊名羆則以此物之大小分又曰熊卽熊之雄者是名熊名羆又以此物之牝牡分爾雅釋獸云羆似熊黃白文郭注云羆似熊而長頭高腳猛慾多力關西呼曰獮羆說文云熊似豕山居多蟄羆似熊黃白文夫熊爾雅以爲似熊則羆與羆是非一種說文分釋之義同爾雅陸璣謂有黃羆有赤羆羆大於熊其脂如熊白而粗理不似熊白美亦分熊羆爲二物本草以羆爲雄熊誤矣今聞之左東北多山獸有熊羆其小者似狗俗名狗駄其大者似馬俗名馬駄形雖近似而非一類熊羆狀俱似豕豎目長鬚

驅壯毛粗能以四足行亦能立以兩足行足大盈尺冬蟻入穴惟舐其足春暖方出足皮被舐粗皮盡脫弱不能行古人美熊之白今則未聞食者其足名蹯今呼熊掌食品所珍其膚最良能治驚癇藥材所貴坤雅云熊蹯春近首夏在腹秋在左足冬在右足四時各易其處向見獵人偶憒問及僉曰不然此說殊不足據熊羆毛不溫潤皮質粗厚古人以此爲裘大東詩曰熊羆是裘今無用者熊羆毛色俱黑爾雅言黃白文陸疏言黃赤色爾雅又謂羆如小熊毳毛而黃郭注云今平山中有此獸狀如熊而小尾俗呼爲赤熊大雅韓奕詩曰赤豹黃羆是熊羆皮毛有色黃者矣虺蛇皆毒蟲蛇類不一烏蛇白蛇黃蛇赤蛇青蛇以色名王蛇線蛇花蛇兩頭蛇以形名巴蛇斬蛇常山蛇以地名而總名曰蛇酉陽雜俎有草蛇水蛇木蛇土蛇四種坤雅云牛以鼻聽蛇以眼聽爾雅翼云蛇常飢每得食稍飽輒復蛻設冬含土入蟻及出蟻則吐之草蛇能於草上行俗名草蠍子水蛇

居水澤俗名水長蟲木蛇棲樹與樹皮相似俗名貼樹皮土蛇土黃色亦居土穴又有一種蛇大於諸蛇皮作黑黃文俗名烏梢蛇蓋鱗屬也虺亦蛇類而其毒尤甚於蛇關左有蛇無虺南方炎地虺毒如火故有於南北方氣寒無此物也爾雅釋魚云蝮虺博三寸首大如擘說文虺作虫注云虫一名蝮詩緝引舍人說云江淮以南曰蝮江淮以北曰虺博物志云蝮蛇秋月毒甚無所螫螫草木以泄其氣草木卽死人採樵爲草木所傷刺者亦殺人柳子厚蝮蛇文云目兼蜂蠻色混泥塗其頸蹙惡其腹次且蹇鼻鈎牙穴出榛居蓄怒而蟠脚毒而趨抱朴子云蛇類最多惟蝮中人甚急但卽時以刀割去瘡肉投於地其沸如火炙須臾焦盡人乃得活蘇氏本草云蝮有四腳能跳來醫人齧已卽跳木上作聲云研木研木者不可救也若云博士叔博叔者猶可急治之楚辭大招云王虺齧只注云王虺大蛇也招魂云蝮蛇蓁蓁注云蝮大蛇此言虺蝮皆爲蛇漢書田儋傳云蝮蓁

手則斬手蟲足則斬足應劭云蝮一名虺蟻人手足則割去其肉不然則死顏師古注云爾雅說文皆以蝮卽虺蝮蛇細頸大頭焦尾色如綬文文間有毛似豬蠶鼻上有針大者長七八尺一名反鼻非虺之類虺若土色所在有之俗名土虺是許氏諸人皆以虺爲蝮顏氏言蝮別爲一類虺卽土蛇蝮有足蛇無足虺卽段成式所言草木水土四種之土蛇非蝮也凡蛇皆有毒其毒在口今之爲蛇醫者敷以雄黃卽愈受毒重者以麝香燒烟薰之立效但不知可醫虺毒否也

誰謂爾無牛九十其犧

毛傳云黃牛黑脣曰犧爾雅釋畜云黑脣犧此不言黃牛者以牛爲土畜黃爲牛之本色不待言也爾雅又云牛七尺爲犧邪疏云言牛黑脣犧又云牛七尺爲犧是犧有二義尸子云大牛爲犧七尺

誰知鳥之雌雄

烏反哺鳥也凡鳥之雌雄難辨猶可卽其羽毛異色辨之至於烏則

首尾純黑雖欲辨之以色而色無別爾雅釋鳥云鳥之雌雄不可別者以翼右掩左雄左掩右雌此似可以辨鳥矣然嘗留心驗之見所畜之雞鷄與來集之鵠鵠亦有右掩左而雌左掩右而雄者爾雅之文亦殊難據况鳥之偶爾飛來渾然一色卽其左掩右掩之翼亦難遽分於以見古詩人善體物也

哀今之人胡爲虺蜴

虺爲蝮蛇蜴爲蜥蜴舊注謂虺蜴皆毒螫之蟲毛傳云蜴蠍也鄭箋云虺蜴之性見人則走則似取其避人不取其毒螫然者此詩上言維號斯言有倫有脊是宜少安勿躁敬聽陳說不似虺蜴見人卽去則與上文直接遞下而集傳則云哀今之人胡爲肆毒以害人是此二語於上文另轉一意與箋異蓋傳以蜴爲蠍蠍也爾雅釋魚云蠍蠍蜥蜴蜥蜴蝘蜓蝘蜓守宮也則是合四名而總爲一物後儒分之爲二其處草澤者曰蠍蠍蜥蜴其棲屋壁者曰蝘蜓守宮蜥蜴卽

今之馬蛇守宮卽今之蝎虎本草云小而五色尾青碧者名斬蝎小而綠牆壁色黑者名蝘蜓漢書東方朔傳云武帝置守宮孟下令朔射之朔曰臣以爲龍又無角謂之爲蛇又有足跂跂脈脈善緣壁是非守宮卽斬蝎本草分斬蝎蝘蜓爲二漢書亦分守宮斬蝎爲二而斬蝎亦言綠壁似斬蝎亦爲守宮之屬邵晉涵爾雅正義云此蟲本一物而四名而後世別爲二者則以在壁在草別之方言云守宮秦晉西夏謂之守宮或謂之蟠螭或謂之斬易南陽呼蝘蜓其在澤中者謂之易蝎南楚謂之蛇醫或謂之蠍蠍東齊海岱謂之蠍蠍說文云在壁曰蝘蜓在草曰斬易今蝘蜓食蝎者多在壁間其在草中者青綠色蓋本爲一物因所在而異其名夫爾雅之釋蠍蠍爲斬蝎亦猶芣苢之爲車前唐蒙之爲女蘿雖多其名而實爲一物是惟言在壁之守宮未嘗言在草之蛇醫也後儒因此二物形色相似并之爲一又曲爲之說本爲一物因所在而異其名豈知蛇醫處草永不入

家守宮樓壁永不至野乎關左呼蛇醫曰馬蛇田間常有蠍蟲爲食見人則急走人倘逐之則力憊不能行口吐雙歧黑舌與蛇宛似俗謂斷蛇爲二馬蛇則能使接合如一故曰蛇醫呼守宮曰蝎虎常見其在壁上以尾擊蝎食之博物志謂畜養守宮食以朱砂擣萬杵點婦女體終身不滅耦則落是言此物能使婦女守閨也故曰守宮二物形最相似首尾俱似蛇有四足馬蛇色白黃圓點花纹蝎虎色蒼黑橫曲花纹馬蛇之足滑只能行野蝎虎之爪澀故能上牆雖皆有毒而未聞其螫人常見小兒捉弄之亦不知齧是與虺爲類而實不類也陸璣疏云虺蝎一名蠍蠍蝎也或謂之蛇醫如蜥蜴青綠色大如指形狀可惡此又以蜥蜴非蛇醫乃與蛇醫相似者又併虺蝎二物爲一物仍名蠍蠍不但與爾雅說文刺謬試問蛇醫守宮外果又有此一種蟲邪蠍蠍既非蜥蜴何以於蠍蠍下又加蝎字邪蛇醫處處皆有本無青綠色者大亦不僅如指也何杜撰至此也或曰十二

時蟲一名避役出容州交州諸處狀如守宮身青色大者長尺許尾與身等齧人不可治嶺南異物志亦載此說此似可爲蝎能螫人之證然詩人用物惟取目前常見者此忽取之外殊不可信且此蟲名十二時不名蝎不宜據之作附會也

田卒汙菜

孔疏云菜者草穢之名此卽藜也見南山有臺

不敢暴虎

虎山獸名見大叔于田

宛彼鳴鳩翰飛戾天

鳴鳩鶡鶠也鳩類不一何以知爲鶡鶠曰以此詩言戾天知之蓋鶡爲鶡鶠形似雀鷹雀鷹之取鳥以爪攫鶡鶠之取鳥以翼擊鶡翼最健奮翻上飛轉瞬之頃刺入霄漢鳴鳩之飛似之故有鶡名鳩鳩同音是鶠卽鳩若斑鳩則爲祝鳩性好橫飛一飛卽止不能戾天故知

鳴鳩爲鵠鵠也毛傳云宛小貌鳴鳩鵠雕或疑雕爲鵠之訛而杜預左傳注亦以鵠鵠作鵠雕鵠雕同爲鶯鳥雕字非訛不必疑也爾雅釋鳥云鵠鳩鵠鵠郭注云似山鵠而小尾短青黑色多聲今江東亦呼爲鵠鵠鳥惟鳴則有聲郭曰多聲是亦以鳴鳩爲鵠鵠也本草云鵠鵠一名鵠鶠北人呼爲鵠鶠鳥其鳴云鈞輶格疎自呼也邵氏爾雅正義云鵠鵠好以春朝鳴其聲連屬如相貫故郭以爲多聲此言鵠鵠之鳴在朝而其鳴實無定候今當日暮鵠鵠羣飛繞村而鳴聲連不斷愈飛愈高至於雲表則見其鳴恆在暮也禮月令季春之月鳴鳩拂其羽太平御覽引蔡邕章句曰鵠鳩也鳩先是時鳴故稱鳴鳩拂猶搏也陽氣所感故搏羽是鵠鳩卽鵠鵠此鳴鳩爲鵠鵠之證而拂羽爲搏羽亦爲戾天之證詩緝云鳴鳩鵠鵠也卽氓詩食葚之鳩鄭子所謂鵠鳩氏司事也莊子所謂鶻鳩非斑鳩也山陰陸氏云莊子所謂鶻鳩笑之者也多聲故名鳴鳩小物決起而飛搶榆枋時

則不至控於地而已矣今飛鳴戾天勉強故也陸璣謂一名斑鳩似
鶡鳩而大項有繡文斑然與此鵠鳩全異璣之言非夫以鳴鳩爲班
鳩固非而以鳴鳩爲鶡鳩亦非斑鳩爲山鵠鳴鳩俗名青鵠子廣雅
云鶡鶡也鵠屬此鳥形似鵠故曰鵠此鳥羽爲青藍色故鵠曰青且
飛且鳴倦息於樹從未見其控地欲與鶡鳩比附轉言翰飛爲勉強
則亦不識物性矣此鳥不能營巢惟奪鵠巢以伏雞形似鷹木屬爲
鷹所化仲春鷹化爲鳩此鷹爲雀鷹此鳩爲鳴鳩他鷹不化鳩他鳩
皆非鷹所化也古帝紀官鵠鳩司事以其春來冬去也若斑鳩則四
時皆有鳴鳩不食桑葚食桑葚者爲鳴鳩傳說本誤嚴注又襲毛傳
之誤或曰斑鳩孝鳥與下有懷二人相關不知此詩所取意在戾天
以鳩飛之高興所念之遠義又別也

中原有菽庶民采之

毛傳云菽穀也力采者則得之孔疏云菽云采之明采取其葉

螟蛉有子蜾蠃負之

毛傳云螟蛉桑蟲也蜾蠃蒲盧也負持也爾雅釋蟲云螟蛉桑蟲果
蠃蒲盧郭注云螟蛉俗謂之桑蠻果蠃卽細腰蟲也俗呼爲蠻蛉則
是螟蛉爲蟲蜾蠃爲蟲二者非相似之物鄭箋云蒲盧取桑蟲之子
負持而去煦育養之以成其子說文云螟蠃桑蟲也蠃蠃蒲盧細腰
土螽也天地之性細腰純雄無子是蛉作蠻蠃作蜾蟲作螽字蓋各
異而訓詁無異陸疏云螟蛉者桑上小青蟲也似步屈其色青而細
小或在草葉上蜾蠃土蜂也一名蒲盧似蜂而小腰取桑蟲負之於
木空中或書簡筆筒中七日而化爲其子里語云呴云象我象我蓋
步屈卽尺蠖桑上亦有此蟲螟蛉似步屈而腰間有足似蠶而織細
口吐絲懸樹上槐桑樹上最多曰桑蟲是桑樹上之蟲也蜾蠃爲土
蜂爲其銜土作窠故名蜂屬之腰皆細而蜾蠃比他蜂俱小銜蟲入
窠之候必鳴一二刻始飛去陸云象我象我此亦會意之言今俗則

云似我似我也聞之亦近似焉許氏陸氏言蟲化蜂說同於鄭而陸說尤詳揚雄法言亦謂螟蛉之子殮而逢果臚祝之曰類我類我久則肖之矣夫先儒解經多有師承蜂負桑蟲化爲其子與誨子式穀意似相關故後學多信從之至於陶貞白著本草而其說忽異曰今有一種蜂黑色蜂甚細銜泥入於人屋及器物邊作房如併竹管其生子如粟米大置中乃捕取草上青蜘蛛十餘枚滿中仍塞口以待其子大爲糧也其一種入竹管中者亦取草上青蟲詩云螟蛉有子蜾蠃負之言細腰之物無雌取青蟲教祝變成已子斯爲謬矣作詩未審而夫子何爲因其僻邪此言螟蛉不能化蜂蜾蠃自能生子乃負螟蛉飼子非取其化陶氏之說異於先儒者一也韓保昇云螟蛉桑蟲也蜾蠃蒲蘆也言蒲蘆負桑蟲以成其子也今有人候其封穴壞而看之見有卵似粟在死蟲之上果如陶說蓋詩人知其大而不知其細也是韓氏亦言蜂自有子不待蟲化說遵陶氏異於先儒者

二也李含光曰視變成子近有數見者非虛言也蘇頌曰物類變化
固不可度蚱蟬生於轉丸衣魚生於瓜子之類非一桑蟲蜘蛛之變
爲蜂不爲異也如陶所說卵如粟者未必非祝蟲而成之者此二說
與先儒合而寇宗奭本草拾遺又非之曰諸家之說不敢舍詩之義
嘗坼窠視之果有子如粟米大色白而微黃所負青蟲卻在子下不
與諸蟲相著陶說近之此寇氏說同韓氏仍主陶說韓氏之說猶聞
於人寇氏之說得之目覩李蘇之說不足取信也異於先儒者三也
李時珍曰蠅蠶之說各異今考諸說並驗其卵及蜂之雙雙往來必
是雌雄當以陶氏寇氏之說爲正李氏蘇氏之說爲誤蓋果蠃自有
卵如粟寄在蟲身其蟲不死不生久則漸枯子大食之而出正如蠅
卵附於蠶身久則卵化穴繭而出也列子言純雄無雌莊子言細腰
者化則自古已失之矣今屢破其房見子與他蟲同處或子已去而
蟲存空殼或蟲成蛹而子尚小蓋蟲終不壞至成蛹子乃食之而出

此說義亦主陶爲親自歷驗之語比韓寇之說尤詳異於先儒者四
也嚴華谷詩續引解頤新語云說者考之不精乃謂螺蠃取桑蟲負
之七日化爲其子雖揚雄亦有類我類我久則肖之之說近世詩人
取螺蠃之巢毀而視之乃自有細卵如粟寄螟蛉之身以養之其螟
蛉不生不死蟲然在穴中久則螟蛉漸枯其卵日益長大乃爲螺蠃
之形穴竅而出蓋此不獨取螟蛉亦取小蜘蛛置穴中寄卵於蜘蛛
腹脣之間其蜘蛛亦不生不死久之蜘蛛盡枯其子乃成今人養晚
蠶者蒼蠅亦寄卵於蠶身久之其卵爲蠅穴繭而出殆物類之相似
者列子云純雌其名大腰純雄其名大遼莊子云細腰者化說文云
天地之性細腰純雄無子此皆信說詩者之言也此綜陶韓寇李諸
家之說而其義則全襲李氏其言蠅卵寄蠶猶小有誤者蓋寄卵於
蠶之蛹爲青蠅非蒼蠅穴繭出者爲蛆由蛆再變蠅穴繭時尚未爲
蠅凡養蠶之家皆常見之然其取螺蠃之生不取螟蛉之化言甚辨

也異於先儒者五也余因後人之說異於先儒嘗於書屋見有銜土爲窠之蜂亦屢破而驗之見蜂始生之子寄於他蟲身者形如米粒黃白色長而不圓少大者形如巨蛆再大者有頭足再大則生翼欲出矣其未成者蟲蛛盈窠將成者蟲蛛爲蜂子蝕殘蜂已飛去則此穴已空惟餘蟲蛛蛻皮也是蜂長成之候則蟲蛛無餘陶氏諸家之說洵不誣矣蘇氏言其如粟之卵未必非由祝蟲而成然一穴之內負蟲至於十數則當盡化爲蜂何以一穴內僅成一蜂邪豈惟祝一蟲餘蟲未嘗祝邪詳察諸說復繹詩意是非詩人不善體物亦非聖人因詩之僻詩殆言螟蛉蜾蠃異類猶可負之以生其子豈父子天性相關獨不可教誨以善使其似之哉詩中比興類取大義此詩先言采菽繼言負蛤以上四句與下二句若式穀黏合蛤蠃立解則采菽又作何解詩義無誤恐儒者之解有誤陶氏諸說得之目驗毋曰先儒之說必不可破也學者說經宜求其是前人有誤未嘗必欲後

人製之致一誤再誤邵晉涵注爾雅堅執舊說則是以耳爲目惜當時無人親執此物使彼目驗之

題彼脊令載飛載鳴

脊令水鳥一名離渠今名顚尾鳥卽郭景純所謂飛則鳴行則搖者也常棣言脊令在原義取其行之搖有不安之象以興急難此詩言脊令之題義取其飛則鳴有圖遠之義以興遇征禽經言脊令友悌詩中兩言此鳥皆喻兄弟因知不識物性者不可以說詩

交交桑扈率場啄粟

桑扈小鳥處處皆有人所常畜或以爲今之蠟燭則誤爾雅釋鳥云桑扈竊脂毛傳云桑扈竊脂也鄭箋云竊脂肉食今乃無肉而循場啄粟失其天性不能以自活傳訓桑扈名竊脂本爾雅箋雖言桑扈肉食而未言其肉之必出於竊也陸疏云桑扈青雀也好竊人脯肉及脂膏故曰竊脂郭氏爾雅正義亦云桑扈俗謂之青雀燭曲食肉

好盜脂膏因名云如是則竊脂之名蓋由於盜竊脂膏名之矣而孔仲達駁之云諸儒說竊脂皆謂竊人脂膏也卽如此言竊元竊黃豈復竊盜元黃乎爾雅釋獸云虎竊毛謂虢貓麌小如熊竊毛而黃竊毛皆爲淺毛竊卽古淺字竊元淺黑也竊藍淺青也竊黃淺黃也竊丹淺赤也則竊脂爲淺白也夫孔氏訓竊爲淺引爾雅竊毛爲據是言脂可盜毛不可盜也語辨而明邵晉涵爾雅正義云孔疏所辨非徒不達物性又不明於詩義也今桑扈色青翠春暮常在叢蕪間孔疏定爲淺白當由未識此鳥以臆決之且三百篇善言物性前後互見宜得會通詩不云乎交交桑扈有鶯其羽又云交交桑扈有鶯其領毛傳云鶯然有文章是鶯者指其色之青翠而言後世以黃雞爲黃鶯亦言其文采也若如孔疏以桑扈爲淺白之鳥然則白鶯白鶯亦可云有鶯其羽有鶯其領乎夫物性各殊不可以強詞而奪桑扈竊肉而食其性然也淮南說林訓云馬不食脂桑扈不啄粟非廉也

則是桑扈之竊食脂膏古人盡物之性以正其名至今可得之目驗
豈得強所不知斷爲淺白哉至於竊藍竊黃竊白爲淺不得與竊脂
一例爾雅命名有取諸聲者如鷗鳩之名鷗鵠鳩鳩之名鷗鵠有象
其形者如燕爲白脰鳥倉庚爲鯀黃以及竊藍竊黃皆是也有指其
事者如鷗鵠爲剖葦鷗爲蜃母鴟爲斬木暨桑扈爲竊脂皆是也古
人命物之名原未嘗預立定制孔疏徒知竊有淺義遂欲併竊脂而
訓爲淺自然則釋鳥有鷄負雀謂鷄能捉雀釋蟲有草蟲負蠶豈可
謂草蟲之負蠶乎蟻鷲一名負盤豈可謂能負盤區乎以是推之則
竊脂之竊爲盜竊之竊竊藍竊黃與獸類之竊毛爲竊淺之竊義本
殊途言各有當不窮物性而望文生義此無異高叟爲詩多見其因
也夫孔氏駁舊注而以竊元竊黃相比則是惟據本文邵氏駁孔注
而以鷗鵠舉蜜相比則是外尋枝節爾雅於諸扈同一言竊不宜淺
盜互詁此無庸辨卽以桑扈之色言之其爲淺白人人習見從未見

有青翠色者如以郭注爲據郭惟言其爲青而未言其爲翠今於淺白之色多呼曰青翠有文又云得之目驗欲將誰欺其或見魚狗之類妄以桑扈當之也試以竊脂言之彼桑扈日日求食人豈能日日適野卽適野亦不必定擣脯肉也如必待竊而食則桑扈之不餓死者有幾如曰飛至人家竊食則桑扈爲野禽恆棲林木從未見其飛近人家至人院落者盜肉之說本不足據而邵氏乃津津言之多方曲喻以攻孔疏不知其所指孔氏之病皆其本身自犯之病爲之備載其說者以見多讀古書最易滋佞足以惑人聽聞也桑扈之性易馴鄉人常有畜者大如蠟燭羽色亦似蠟黑尖銳稍曲黑眉如畫淺青白色所以有竊脂名喙下翼間皆有花文所以有鶯羽鶯領之稱又有淺藍淺黃淺黑淺赤色者此卽爾雅所謂秋鷹竊藍冬鷹竊黃夏鷹竊元棘鷹竊丹者也形體比雀微大而好食雀不能用力直攫

每乘雀之不意搏而食之或捉雀之難亦食蟲類詩細引山陰陸氏說言桑扈有二種爾雅桑扈竊脂鴟鵝剖葦此桑扈之一種也桑扈竊脂棘扈竊丹此桑扈之一種也蓋對剖葦言之則竊脂者所謂青質蠶曲食肉好盜脂膏者是也對竊丹者言之則竊脂者所謂素質其翅與領皆鶩然而有文章者是也夫鴟鵝卽鴟鵝是桃蟲非桑扈棘扈爲九扈之一亦非桑扈乃以爾雅兩載桑扈於上下相連之文併而爲一賈逵左傳注一春扈二夏扈三秋扈四冬扈五棘扈六行扈七宵扈八桑扈九老扈此爲九扈若棘扈卽桑扈則九扈缺一扈矣同名竊脂一則盜竊脂膏一則翅領鶩然不切竊脂立訓尤爲怪事總由不識此鳥愈牽混而愈支離其誤愈遠也如此習見之鳥而注釋尙反復衆訟不能斷決立言之難盡信蓋若此哉關左因桑扈多聲俗呼曰麻噴噴冬扈能捉鴉俗呼曰鵠鵠鸕子又呼曰冷噴噴遠北呼桑扈曰白哱哱子又呼之曰戶不刺

毛詩多識卷九終

毛詩多識卷十

長白多隆阿著

小雅下

弁彼鸞斯歸飛提提

毛傳云鸞卑居卑居雅烏也提提羣貌鄭箋云樂乎彼雅烏出食在野甚飽羣飛而歸提提然爾雅釋鳥云鸞斯鵠鵠郭注云鵠烏也小而多羣腹下白江東亦呼爲鵠烏孔疏云此烏名鸞而云斯者語詞猶蓼彼蕭斯菀彼柳斯以劉孝標之博學而類苑立鸞斯之目是不精也傳以斯爲語詞故單言鸞爾雅雙言曰鸞斯猶俗呼燕曰燕子呼竹曰竹子與下柳斯鹿斯同例字書斯亦作鸞猶之振鶯或作鶯鶯本無足異孔氏之辨亦多事矣鸞斯卑居皆同音烏雅亦同韻原可通釋傳作連珠訓以此學問之精粗正不必於此等處吹毛索也周官夏官羅氏掌羅鳥鳥鄭注云烏卑居之屬水經注引孫炎云卑

居楚烏詩緝云烏有三種純黑反哺者謂之烏小而腹下白不反哺者謂之鴉烏白項而羣飛者燕烏燕烏卽爾雅之白脰鳥古有鴉經占吉凶南人喜鵲惡鴉北人喜鴉惡鵲師曠以白項者爲不祥蓋鶩卽今之山老鴉俗呼曰山老呱其聲呱呱不已故名呱此鳥似慈烏而大鷺腹下白不反哺又名楚烏又名大鷺烏其飛數十成羣頗傷禾稼烏鵲兩種鳥無日不鳴四時常有何吉何凶亦無取此作占驗者鴉經之說不足信也

維桑與梓必恭敬止

桑梓俱木名見定之方中

莞彼柳斯鳴蜩嚙嚙

柳木名見將仲子蜩蟲名見七月

有漼者淵萑葦淠淠

萑葦也葦葦也見葦葦

鹿斯之奔維足伎伎

鹿山獸名見野有死麌

雉之朝雊尙求其雌

雉山鳥名雉雉聲也見雉雉

相彼投兔尙或先之

兔野獸名見兔爰

趯趯鳩免遇犬獲之

毛傳云鳩兔狡兔也鄭箋云遇犬大之馴者謂田犬也孔疏云蒼頡解詁云鳩大兔也大兔必狡猾又謂之狡兔說文云狡兔兔之駿者戰國策云東國遼者海內之狡兔也又云狡兔有三窟傳訓鳩爲狡疏訓鳩爲大說文訓狡兔爲駿駿亦大也義俱通

爲鬼爲蜮則不可得

毛傳云蜮短狐也孔疏云洪範五行傳言蜮如鼈二足生於南越陸

璣云一名射影江淮水皆有之人在岸上影見水中投人影則殺人故曰射影楚辭云魂兮無南蜮傷躬只是蜮之害人古說皆然抱朴子言蜮狀如蠅五行傳言蜮狀似龜李氏本草謂此蟲長二三寸廣寸許形扁前闊後狹腹軟背硬負甲黑色似蛦蛦甲下有翅能飛鋏鋏作聲頭有一角長三分餘有六足雙屈前足抱拱其喙正如橫弩上矢之狀蟾蜍鴛鴦能食之鵝鴨能避之關左止水渟聚之處雖旱不涸蘋藻之中則有蟲似蛦蛦甲黑如漆腹色淡白此亦蜮屬但不災人爲異博物志云江南水溪中有甲蟲名射工長一二寸口有弩形以氣射人影令人發瘡不治殺人周官壺涿氏掌黜水蟲以炮土之鼓敲之以焚石投之卽蜮類蜮之腹下足刺如槍有毒螯酉陽雜俎故又名抱槍漢書五行志言春秋莊公十八年秋有蠻劉向以爲蜮生南越越地多婦人男女同川淫女爲主亂氣所生故聖人名之曰蠻蜮猶惑也在水傍能射人南方謂之短狐夫蟲豸之生因乎水

土毒蠶之物五方俱有何關人事劉氏言誠生南越由於女淫魯在山東何以有之不足信也

妻兮妻兮成是貝錦

毛傳云貝錦錦文也鄭箋云錦文者文如餘泉餘蟻之貝文也爾雅釋魚云貝居陸陳在水者𧔗大者𧔗小者𧔗元貝貽貝餘𧔗黃白文餘泉白黃文𧔗博而頑𧔗大而險𧔗小而懦此言貝之屬凡十種古用以爲貨漢書食貨志云金刀龜貝所以通有無說文云貝海介蟲也古者貨貝而寶龜周而有泉至秦廢貝行錢埠雅云貝以其背用故謂之貝相貝經云朱仲受之於琴以遺會稽太守嚴助其略曰貝盈尺狀如赤電黑雲曰紫貝赤質紅章曰珠貝青地綠文曰綏貝黑文黃畫曰𧔗貝此下有浮貝濯貝嚼貝慧貝此言貝之屬有八種名與爾雅俱異今不行此貨故亦無能識者易震六二儻喪貝注云貝資貨糧用屬也書盤庚具乃貝玉疏云貝者水蟲古人取其甲以

爲貨如今之用錢然史記平準書云農工商交易之路通而龜貝金
錢刀布之幣興焉是古之用貝與錢並行而貝尤貴於錢如今之用
錢與金銀金銀貴於錢數十倍也夫古既以貝爲貨而又以貝爲飾
魯頌云貝胄朱綬是也陸疏云貝水中介蟲其文采之異大小之殊
甚衆此詩貝上冠以斐貝下綬以錦意不在貝之可貴而在貝之有
文言貝本非錦以妻斐之文成之則似錦矣

取彼譖人投畀豺虎

虎山獸見大叔于田豺山獸之小者爾雅釋獸云豺狗足說文云豺
狼屬狗聲夏小正十月豺祭獸禮月令季秋之月豺乃祭獸高誘注
呂氏春秋云豺似狗而長毛其色黃於是月殺獸四圍陳之漢書郊
祀志云豺獺有祭顏師古注云豺華搏之獸形似狗陸佃云俗云瘦
豺豺柴也豺體細瘦故謂之豺棘闢左東北大山有豺俗呼曰豺狗
小似厖善搏噬偶見大獸一豺吠而羣豺集互齧大獸咽喉腹肋任

彼咆哮跳竄堅不脫口待獸已死則羣咂食熊虎之屬皆畏之史記周本紀云如豺如離喻言武士之猛山居人家惟言豺之食獸而不言其咥人孟子則以豺狼爲嫂溺不援者比左氏春秋傳云戎狄豺狼又云豺狼之聲漢書孫寶傳云豺狼當道不宜復問狐狸班固東都賦云豺狼攝竄豺皆與狼並言豺小於狼數倍而其殘忍害物與狼不相遠也

蓼蓼者莪匪莪伊蒿

毛氏菁菁者莪傳云莪蘿蒿也爾雅釋草莪名蘿抱根叢生本草名抱娘蒿春嫩亦可食山陰陸氏云莪一名角蒿詩緝云爾雅言葵之醜秋爲蒿醜類也蒿春始生氣味既異故其名不同至秋老大成則皆名蒿蓋以莪形蒿則莪美而蒿惡莪始生香美可食至秋老大爲蒿則粗惡不可食故菁莪以喻人才而蒿止爲鹿食也莪蒿處處有之生於山原每叢數莖葉略似蒿而不香細於葵蒿根莖歷冬不死逢

春復生俗名山蒿

蓼蓼者莪匪莪伊蔚

毛傳云蔚牡藪爾雅釋草云蒿藪蔚牡藪郭注云今人呼青蒿香中炙啖者爲藪牡藪無子者陸疏云蔚牡蒿也三月始生七月華似胡麻華而紫赤八月爲角角似小豆銳而長一名馬新蒿夫馬新廣雅作馬先入藥名茵陳蒿老梗經冬不死來歲在發故名因陳古名藪或作墅野田多有之說文藪名香蒿

有列汎泉無浸穢薪

毛傳云穰艾也艾卽刈也嚴氏詩緝引之直作刈鄭箋云穰落木名也爾雅釋木云穰落郭注云可以爲杯器素邢疏云穰一名落素謂樸也夫素者言此器由於生成不假人工爲之箋從爾雅不從毛傳陸疏云穰今榔榆也其葉如榆其皮堅韌剝之長數尺可爲絅索其材可爲杯器張景陽七命云剖椰子之殼注云榔樹似檳榔實大如

瓠裏有汁美如蜜核可作飲器殼卽核也此木關左所無而此器則常見之乃商賈販來以爲貨者可代匏用名曰椰瓢

山有嘉卉侯栗侯梅

栗梅木果名栗見定之方中梅見標有梅

匪鴂匪鳶翰飛戾天

毛傳云鴂鷗也鷗鳶貪殘之鳥也說文引此詩句鴂作鵠鳶作鳶孔疏云說文鵠鷗也從敦而爲聲字異於鴂也鷗之大者又名鵠孟康漢書音義曰鵠大鷗也鳶鷺鳥也鴂鳶皆殺害小鳥故云貪殘之鳥蓋鷗似鷹而大健翮長尾圓目鈎喙强悍多力關左鷗有數種其羽純黑色者名皂鷗其羽黃白文者名花鷗其大者能捉狐貉名坐山鷗翮翎作箭羽皆良鳶卽鴂字經文作鳶鷄類也似鷹而小善高翔其攫物如射故從弋卽隼也又名鵠夫鴂爲鷄類不能戾天先儒故引說文字作鵠鳶能高飛依經原文自可作詁故不從說文作鳶而

詩中首句多有用韻者蓋天淵三字爲韻改薦亦非韻也

匪鳣匪鮀潛逃于淵

鳣鮀魚名見碩人

山有蕨薇

蕨薇皆山蔬名見草蟲

隰有杞桋

毛傳云杞拘櫟也櫟赤棟也夫拘杞非隰木而與櫟棟相配則疑爲杞柳嚴氏詩緝注四牡集于苞杞云將仲子無折我樹杞柳屬也有臺南山有杞湛露在彼杞棘杞爲山木也此詩集于苞杞雅林杜北山言采其杞四月隰有杞桋杞皆枸杞也枸杞也山杞也杞柳也是杞有三也蓋詩中之杞誠有三種而其類宜於上下之文別之將仲子之杞植於里牆宜爲杞柳北山之杞言采四牡之杞言苞宜爲枸杞湛露在彼杞棘杞與棘爲伍杞亦有刺非大木亦宜爲枸杞有臺

之杞生於山宜爲山杞此詩之杞生於隰枸杞生高原非隰木與棟不相配故不宜以枸杞釋之是宜爲柳杞柳隰木也棟大木也爾雅釋木云棟赤棟白者棟郭注云赤棟樹葉細而岐銳皮理錯戾好叢生山中可爲車輅白棟葉圓而岐爲大木陸疏云棟葉如柞皮薄而白其木理赤者爲赤棟白者爲棟其木皆堅韌今人以爲車轂郭陸皆釋棟有赤白二種棟又名棟棟爲棟之赤色者闕左此木多有俗呼曰色木色棟音近葉細而薄似薜荔而五岐皆尖銳木釋色白至老則中心俱赤五月開小碎黃花似桂而不香結子三角似菱而細木堅爲車材木瘦制器花紋可愛陸氏謂其葉如柞郭氏謂其葉圓而岐皆誤詩緝引曹氏說改棟爲荑似爲杞之荑與上句蕨蕧不稱也尤誤

陟彼北山言采其杞

杞拘杞爲拘杞故言采見四牡

采蕭種菽

蕭香蒿見采葛菽豆也見生民

楚楚者茨言抽其棘

茨蒺藜也茨一作蕡楚辭章句引作楚楚者蕡茨見牆有茨棘酸棗

見凱風

生我百穀

穀類至多通名曰穀有曰五穀者周禮天官疾醫云以五穀養其病注云麻黍稷麥豆有曰九穀者周禮天官太宰云三農生九穀鄭司農注云黍稷秫稻麻大小豆大小麥又云九穀無秫大麥而有粱蕎有曰六穀者周禮天官膳夫云食用六穀注云黍稷粱麥蕎稌有曰百穀者爾雅翼云梁者黍稷之總名稻者溉種之總名菽者衆豆之總名三穀各二十種爲六十蔬果之屬助穀各二十種凡百穀

黍稷或或

黍稷皆穀名見黍離

疆場有瓜

瓜蓏也夫瓜有二種有果瓜有菜瓜此詩下句爲是剝是菹毛傳云剝瓜爲菹也鄭箋云農人於田畔上種瓜瓜成又入其稅天子剝削淹漬以爲菹貴四時之異物是瓜爲菹又剝而淹漬之此爲菜瓜也不稂不莠

毛傳云稂童粱也莠似苗也稂卽秋粱莠爲似苗之草稂見下泉莠見甫田

去其螟螣及其蟊賊無害我田穉

毛傳云食心曰螟食葉曰螣食根曰蟊食節曰賊鄭箋云此四蟲者恒害田中之穉禾爾雅釋蟲云食苗心螟食葉螣食節賊食根蟊陸疏云螟似虸蚄而頭不赤螣蝗也賊李中蠹蟲赤頭身長而細或云螽蟟姑食苗根爲人害李巡云食禾心爲螟言其蟲冥冥難知也食

禾葉者言假貸無厭故曰膳食禾節言貪狼故曰賊食禾根者言其稅取萬民財貨故云盜孫炎云皆政貪所致因以爲名也許慎云吏犯法則生螟乞貸則生螣冒取民財則生盜夫泥字作詁未必盡然然洪範言休咎中庸言位育人事成於下天道應於上前儒立說各有深意正宜存之以爲貪墨者贊也蓋螣爲蝗俗名螞蟻盜爲螻蛄俗名地刺姑賦似蠶食果者色赤食禾者色白禾藉中恒有之

交交桑扈有鶯其羽

桑扈鴟脂戶不刺也見小宛

鶯鶯于飛舉之羅之

毛傳云鶯鶯匹鳥鄭箋云匹鳥言其止則相偶飛則爲雙性鶯鶯也古今注云鶯鶯雌雄不相離人獲其一則一相思而死故謂之匹鳥埤雅云鵠好外反鶯好內思正字通云鶯鶯紅頭廻尾黑頭有白長毛質杏黃色具文采蓋此鳥形似鳥喙爲趾連頭掌俱紅雄者羽毛

五色文采陸離雌者羽毛淺黃無文采水澤間常見之有則必雙無
單棲者俗呼曰鴛鴦鳴

薦與女蘿施于松柏

陸佃埤雅云薦是松柏上寄生女蘿是松上浮蔓此言薦自爲薦蘿
自爲蘿是二物也鄭樵通志云寄生有二種大曰薦小曰女蘿此則
并薦蘿爲一物爾雅釋木云寓木宛童郭注云寄生樹一名薦釋草
云唐蒙女蘿女蘿兔絲是薦爲木屬枝生蘿爲藤屬蔓生薦蘿判然
非一類也此可以證通志之誤陸疏云薦一名寄生葉似當臘子似
覆盆子女蘿今兔絲蔓生草上黃赤如金非松蘿松蘿自蔓松上生
枝與兔絲殊異此分薦蘿爲二與爾雅合而言女蘿爲兔絲非松蘿
則又與毛傳異毛傳云女蘿兔絲松蘿也此言女蘿爲兔絲又名松
蘿陸氏乃言女蘿爲兔絲蔓生草上而詩明言施松非言施草顯與
經戾不可訓也蓋寄生不惟生於松柏而榆柳樹上尤多直枝而有

岐杖枝葉俱對生葉似榴而厚脆冬寒不凋經霜雪而倍綠子似大
豆色或黃或赤破之有黏汁本無根託樹爲根俗名凍青蘿則如簾
纏繞於樹葉小長圓不一各自爲根蔓寄於樹樹本漸大而簾深入
皮之內俗名絡簾淮南子云千年之松下有茯苓上有兔絲又云茯
苓掘兔絲死又云兔絲無根而生蛇無足而行魚無耳而聽蟬無口
而鳴皆自然也此蓋言松下茯苓與兔絲同氣可見兔絲亦施松之
物兔絲亦可名松蘿豆藍蓬蒿之上皆生兔絲彼爲草上兔絲此爲
木上兔絲猶之同爲薦蓄而有水生陸生之別同爲芍藥而有草本
木本之別兔絲原屬寄生之物生於草上者類草生於木上者類木
同名女蘿爲其寄生處異遂判爲二物不容混也抱朴子云菟絲之
草下有茯苓之根是言菟絲之下必有茯苓茯苓惟松下有之此亦
菟絲卽女蘿之證本草分茯苓菟絲爲二又分女蘿松蘿爲二蓋由
藥性不同功用各異故分言之經文明言女蘿施松柏爾雅明言女

蘿爲兔絲不必強分致生異說漢書禮樂志云豐草孽女蘿施應劭注云女蘿兔絲也此又一確證矣關左東北大山松下常生茯苓諸儒言下彼創藥材者云冬至候斫松留其根年久根腐始生茯苓諸儒言下有茯苓上有女蘿是非伐去之松矣古樂府云南山羣羣兔絲花北陵青青女蘿樹由來花葉同一心今日枝條分兩處唐樂府云兔絲故無情隨風任顛倒誰使女蘿枝而來強繁抱兩草猶一心人心不如草皆言女蘿兔絲爲一心是一物而有兩名也讀者詳之

依彼平林有集維鶴

毛傳云鶴鶴雉也鄭箋云平林之木茂則耿介之鳥往集焉爾雅釋鳥云鶴雉說文云鶴走鳴長尾雉也陸疏云鶴微小於翟走而且鳴音鶴鶴然其色如雉雉尾如雉尾而長其頭上有肉冠冠上蒙毛長數寸肉甚美林廬人語曰四足之美有鷹兩足之美有鶴薛綜云雉之健者爲鶴尾長六尺清人二矛重鶴韓詩作此字言以鶴羽飾矛

也是鶴亦雉類尾獨長關左無此雉也

析其柞薪其葉滑兮

柞柟類木亦與柟相似柟葉長而尖柞葉圓而圓柞之異於柟者以此柞柟枝有四棱木漸大則皮皴厚皴亦漸隱性堅強風雨剝蝕數十年可以不腐俗亦呼曰柞木長極遲百年始克成材其葉大如荷葉長蒂名波羅葉實亦似柟而微長亦有斗包其半斗上粗毛茸茸然名曰樹斗詩緝以柞爲柟蓋以柟名尖柞有柞名因誤爲一類耳

營營青蠅止于樊

說文云蠅蟲之大腹者埤雅云青蠅亂聲是蠅有數種此則惟舉其二蒼蠅居室中青蠅居野外蒼蠅色黑青蠅色綠二蟲之名以色別此詩比謔是爲青蠅青蠅比蒼蠅微大日營營於臭穢不惟求食兼以育子俗呼爲綠豆蠅毛傳云營營往來貌鄭箋云蠅之爲蟲汙白使黑汙黑使白喻佞人變亂善惡也言止於樊欲外之令

遠物也詩緝引劉氏說云蛆蟲所變而成者青蠅也其飛聲則營營然亂人之聽其止於物則穢敗之又從而生蛆蛆復變爲蠅其穢敗於物無有紀極也此以營營爲蠅聲與傳異而亂聲者爲蒼蠅非青蠅雞鳴詩曰匪雞則鳴蒼蠅之聲經文自明以日日習見之物說之者尙不能的儒家注書不可盡信類如此矣

營營青蠅止于棘

棘小木酸棗也見凱風

營營青蠅止于榛

榛小木山果也見簡兮

魚在在藻有頌其首

藻水草見采蘋

魚在在藻依于其蒲

蒲水草見澤陂

采菽采菽筐之筥之

毛傳云菽所以芼太牢而待君子也鄭箋云菽大豆也采之者采其葉以爲藿三牲牛羊豕芼以藿蓋大豆之葉名藿古以爲蔬小宛中原有菽庶民采之七月七月烹菽皆爲豆藿以豆藿芼牲以蕷藻芼魚亦古禮之禮文如此藿爲陸草故用之芼牲藻爲水草故用之芼魚各從其類實有條理三代以後未聞有此矣

觱沸檻泉言采其芹

鄭箋云芹菜也爾雅釋草云芹楚葵郭注云今水中芹菜芹一作蒼說文云蒼菜類蒿呂氏春秋云菜之美者雲夢之芹高誘注云芹生水涯蓋卽今之水芹菜也又名野芹山陰陸氏云芹潔白而有節其氣芬芳而味不美故列子以爲客有獻芹者鄉豪取而嘗之頓於口慘於腹也本草芹又作薪一名水英有赤白二種二月生苗葉似芎芻莖有節稜而中空其氣芬芳五月開細白花食之與園芹略同夫

野芹處處皆有生於澤畔莖葉花子皆似圓芹但圓芹莖單野芹莖岐圓芹莖半圓野芹之莖通體俱圓圓芹大如箸野芹之莖粗倍之圓芹莖無節色青綠野芹莖有節色有紫者味芳而微辛不至頓口慘腹也陸說未免過甚矣

維柞之枝其葉蓬蓬

柞木名見車葦蓋柞木生葉比他木較遲關左氣寒柞葉生於立夏以後秋霜葉乾仍黏於枝風吹不隕至來年新葉生舊葉始落也

毋教猱升木

毛傳云猱緩屬鄭箋云猱之性善登木爾雅釋獸云猱蠻善援邢疏云猱一名蠻善攀援樹枝說文云蠻善援禹屬蓋蠻卽猱又作猿從虫從犬字無異義埤雅云誠一名猱顏氏以爲其尾柔長可藉制字從柔以此猱卽猴之類長臂善噏便攀援故其字從援或曰猱性靜緩故從爰猴之德躁以爰猱之德靜以緩陸疏云猱猶猴也楚人謂

之沐猴老者爲猱長臂爲猿猱之白腰者爲漸胡漸胡猱駿捷於猱
猴然則猱猱其類大同也本草名誠生川陝深山中似猴而大毛長
而黃輕捷善緣木邵氏爾雅正義云猱與沐猴靜躁不同而狀相類
單舉其文則或謂之猱或謂之猱連舉其文則謂之猱猱管子云緣
高出險猱猱之所長人之所短也墜岸千仞人之所大難也而猱猱
飲焉今猱猱好攀援其飲水輒自高崖或大木上槃槃相接而下飲
畢相引而上信若管子所言矣是猱猱猴三物形色小異而爲同類
故注疏亦互爲立訓舊言猱產西南今關左亦間有之每於秋果熟
時由山海關北諸大山牽引至醫巫閬山采果食人常見之形有大
小之異而總呼之曰猴似狗而面微圓赤目狹腮能立作人行好緣
樹尋果食升木其天性也

有菀者柳不尚息焉

柳木名見王風揚之水不流束蒲注又見將仲子無折我樹杞注

彼都人士狐裘黃黃

狐山獸名毛色多黃見北風

彼都人士臺笠緇撮

毛傳云臺所以禦暑笠所以禦雨也鄭箋云臺夫須也都人士以臺皮爲笠孔疏云臺草名可以爲笠夫臺卽莎草織以爲笠禦暑禦雨皆可用傳則分言之實一物也見南山有臺

彼君子女卷髮如薺

鄭箋云薺薺蟲也尾末捷然似婦人髮末曲上卷然孔疏云薺薺蟲也通俗云長尾爲薺短尾爲𧆚此蟲處處有之形似地𧆚而扁闊青色八足前二足作雙鉗如蟹長尾有節尾末有鈎向上螫人最毒居老屋敗壁中晝伏夜出守宮好食之相傳此物生子坼背而出噉食雌蟻已盡然後分行一生六十六子俗呼曰𧆚子本草名𧆚𧆚廣雅名杜伯孝經緯云蜂𧆚垂芒爲其毒在後春秋僖公二十二年傳云

蜂蠻有毒史記淮陰侯傳云猛虎之猶豫不如蜂蠻之致螫蜂蠻並言而蠻之毒尤烈於蜂也陸疏云蠻幽州謂之駢酉陽雜俎言江南舊無蠻開元初有主簿以竹筒盛過江至今往往有之故俗名曰主簿蠻或曰主簿卽杜伯兩字聲近致訛

終朝采綠不盈一掬

鄭箋云綠王芻易得之菜也詩緝云綠木賊也夫綠爲王芻見淇澳郭氏爾雅注名鴟腳莎本草名曰黃草言可以染黃色與次章藍草爲一類鄭箋以綠爲菜此草俗名三角菜本有菜名也木賊有莖無葉可以銼木俗名銼草與王芻迥異

終朝采藍不盈一襜

鄭箋云藍染草也孔疏云藍可以染青淮南子云青出於藍夏小正云五月啓灌藍蓼禮月令云仲夏之月令民無刈藍以染說文云藍染青草蓋言此草之汁可染藍色故名藍也本草所載之藍草不一

一名蓼藍葉如蓼 一名菘藍葉如菘 一名馬藍葉如苦蕡 一名吳藍
長莖如蒿而白花 一名木藍長莖如決明葉似槐 凡五種皆可染色
王氏羣芳譜云藍染草也有數種大藍葉如蒿苜而肥厚小藍莖赤
葉綠而小槐藍葉如槐葉皆可作靛此言藍有三種所謂大藍者卽
馬藍小藍卽蓼藍槐藍卽木藍仍在本草五藍之內惟名小異爾雅
釋草云歲馬藍此僅爲藍之一種周禮掌染草注云染草藍蒨象斗
之屬是言三物皆爲染草蒨卽茹蕷染色紅象斗卽橡斗可以染黑
藍染青也通志云藍三種蓼藍染綠大藍染碧槐藍染青三藍皆可
作濃色成勝母故曰青出於藍關左所有惟蓼藍春種生苗葉似莧
莖高二三尺寸餘一節一節一葉六月花開成穗似蓼花色紅而艶
秋後成子似蕎麥三稜而細黑光如漆俗呼曰濃草花初開時刈取
莖葉泡爲綠汁外加石灰收取濃液以染藍色一入綠二入碧三入
青五六入則色益深入藥名青黛

其釣維何維釣及餌

鯈鰐也見汝瑣鰐鱗也見敝笱

瓦瓦黍苗陰雨膏之

黍穀名見黍離

隰桑有阿

桑木名見定之方中

白華菅兮白茅束兮

毛傳云白華野菅也已漚爲菅鄭箋云白華於野已漚名之爲菅爾雅釋草云白華野菅郭注云菅茅屬陸疏云菅似茅而滑澤無毛根下五寸中有白粉者柔韌宜爲索漚及曝尤善也夫爾雅陸疏皆言菅爲草名類似茅原野有似葦之草而細小中空此爲茅也山岡有似葦之草而堅韌中實此爲菅也茅葉莖皆有毛菅則無毛茅根味甘而脆菅根味淡而長有筋此菅茅二草之別也菅用水漚之則柔

軟可用東門之詩云可以漚菅是言菅漚於池非言已漚者始名菅也說文廣雅皆以菅爲茅蓋菅爲茅之別種非菅卽茅此詩菅茅分詠可驗也孔疏云漚之柔軟異其名謂之菅因謂在野未漚者爲野菅也白茅俗曰茅針草見野有死腐

有鶴在梁有鶴在林

毛傳云鶴禿鶴也說文作禿鶴古今注云扶老禿秋也狀如鶴而大山陰陸氏云鶴性貪慾其毛辟水毒好啞蛇劉氏魯都賦云綠錦葱鶴是鶴羽色青也李氏本草云禿鶴水鳥之大者青蒼色長頸赤目頭項皆無毛其頂皮紅色如鶴頂其喙深黃色而鳥直長尺餘凡鳥至秋脫毛則禿此鳥頭禿如秋瑟如老人頭童翼長廣五六尺舉頭高六七尺嘴下有胡袋足爪如雞黑色性貪惡食魚兼食鳥雜埤雅云鶴性貪惡俗呼禿鶴一名鶴鶴飲膳正要云鶴鶴有三種有白者黑者花者俗名胡鶴鶴其肉色亦不同元時猶有鶴鶴之供闢左無

鴟其性類鶲其狀類鶴惟頭秃爲異鶲見鶲鳴

鴟在梁戢其左翼

鴟水鳥似鷺而羽色與家鷺異飛則同飛宿則同宿故又名匹鳥杜甫詩云鴟鴞不獨宿也此鳥有物傷其一其匹則不食而死孟郊詩言鴟鴞會雙死也戢其左翼者是言插喝於翼蓋言其宿廣雅云戢插也凡鳥之宿無論長短項宿則必回其頭插喝於翼而其頭左回者多右回者少留心驗之其說不謬也

絲蠻黃鳥止于丘阿

黃鳥鶡也絲蠻鳥聲見葛覃

幡幡瓠葉采之烹之

毛傳云幡幡瓠葉貌庶人之菜也蓋瓠爲甘瓠匏屬古以瓠葉爲菜今無食者見南有嘉魚

有兔斯首炮之燔之

兔山獸之小者見兔爰

有豕白蹢烝涉波矣

毛傳云豕猶也蹢蹄也大喜雪馬喜風豕喜雨故天將久雨則豕進涉水波爾雅釋獸云四蹄皆白蹢孔疏云蹢者躁疾之言白蹢名之爲蹢是躁疾於餘豕夫躁疾驚駭凡豕皆然不必蹄白者始然爾雅祇言名蹢非驚駭也易曰見豕負塗是豕喜處泥中白蹄爲泥所塗不恆見至兩多泥爲兩滌白蹄見矣有豕白蹢久雨之徵也

苔之華芸其黃矣

毛傳云苕陵苕也將落則黃鄭箋云陵苕之華紫赤而繁華衰則黃爾雅釋草云苕陵苕黃華蓼白華菱本草言苕有數名一名陵時一名女葳一名芨華一名瞿一名陵霄引蔓依木而生高數丈春初生枝一枝數葉尖長有齒花開夏秋之間一枝十餘朵赭黃色陸疏言苕一名鼠尾花紫可以染皂羣芳譜云陵霄花一名鬼目一名紫葳

處處有之多生山中人家園圃亦植野生者蔓繞數尺得木而上卽高數丈蔓間纓如蝎虎足附樹上甚堅牢花大如牽牛花頭開五瓣赭黃色有紅點夏中乃深秋更赤八月結莢如豆角長三寸餘子輕薄如榆仁此草關左未有嘗於燕晉園圃寺院見之支木立架以供賞玩王氏言其纓如蝎足蔓草中多有類此者亦可謂善喻矣其花始開色黃至秋則紫故有紫葳名鄭箋本草各據一時言之故紫赤赭黃之色小異陶氏以苕爲瞿麥瞿麥俗名石竹莖如竹葉亦如竹高尺餘非蔓生亦無赭黃色者殆以苕一名瞿故誤

匪兜匪虎率彼曠野

兜虎皆獸名兜見吉日虎見大叔于田

有芃者狐率彼幽草

狐山獸見北風

毛詩多識卷十終

毛詩多識卷十一

長白多隆阿著

大雅

驥驥彭彭

毛傳云駢馬白腹曰驥言上周下殷也孔疏云郭璞爾雅注驥驥赤色黑驥也檀弓說三代乘馬各從正色而周不純赤明其有義故知白腹爲上周下殷高誘注淮南子云黃色白腹曰驥與毛傳爾雅俱異禮檀弓云周人尚赤戎事乘驥則驥本非黃色傳疏皆同爾雅而上周下殷之說亦有解不去者馬之毛色上赤下白間亦有之若殷之代夏亦取上白下黑者乎恐馬無此毛色也

時維鷹揚

毛傳云鷹揚如鷹之飛揚也鄭箋云鷹鸞鳥也爾雅釋鳥云鷹鳩鳩郭注云鳩當爲鷂字之誤左傳作鷂鳩是也春秋昭公十七年傳云

爽鳩氏司寇也杜注云爽鳩鷹也鷹故爲司寇裴氏新書云鷹在衆鳥間若睡寐然故積怒而後全剛生焉詩大雅維師尙父時維鷹揚言其武之奮揚也正字通云鷹雄形小雌體大生於窟者好眠巢於木者常立雙骾長者起遲六翮短者飛疾禮月令季夏之月鷹乃學習注云雛學飛季秋之月鷹乃祭鳥注云欲食鳥先殺鳥不食夫鷹大如鴟羽色青蒼而有黃白斑點金目鈞喙黃足鈞爪獵者畜之名曰黃鷹今人於鷹鳥之屬恆以鷹呼之而類分大小其小者僅能捉雀名雀鷹其大者捉雉兔名兔鵠史記酷吏傳時人號郅都曰蒼鷹言其性好殺也本草又有虎鷹翼廣丈餘能搏虎如此大者關左未見鳩化之鷹乃鶻屬非此詩所言之鷹也嚴氏詩緝闡雎注云左傳鄭子所述五鳩詩中皆有之睢鳩氏司馬此詩所言之鳩是也祝鳩氏司徒鵠鳩也四牡嘉魚之離是也鴟鳩氏司空布穀也曹風之鳩鳩是也鵠鳩氏司事鷺鳩也小宛之鳴鳩與氓詩食桑葚之鳩是也

歐陽氏以居鵠巢之鳩非鳴鳩則又在五鳩之外也蓋五鳩皆備於詩嚴氏之說然矣而其注亦有誤者雎鳩爲司馬卽魚鷹祝鳩爲司徒卽斑鳩鳴鳩爲司空卽俗所呼之抱鳩乃布穀字音之傳鳩鳩爲官司寇卽此詩所言之鷹鵠鳩爲司事卽青鳶子爭鵠巢者鵠鳩不食桑葚食桑葚者爲鳴鳩鵠鳩好鳴故又名鳴鳩以其爲鷹所化其形猶似鷹與鵠爭巢猶有驚意不在五鳩外而亦非鳴鳩也

絲絲瓜瓞

毛傳云瓜紹也瓞臚也鄭箋云瓜之本實繼先歲之瓜必小狀似臚故謂之瓞孔疏云瓜瓞瓜紹之瓞也瓜之族類本有二種大者曰瓜小者曰瓞而瓜蔓近本之瓜必小於先歲之大瓜以其小如臚故謂之瓞瓞是臚之別名故云瓞臚也爾雅釋草云瓞臚其紹瓞郭注云俗呼臚瓜爲瓞紹者瓜蔓緒亦著子但小如臚夫瓜瓞之說諸儒皆本爾雅近本之瓜俗名主根瓜其實小不如後結者大此詩以瓜爲

蔓草義取綿綿而長以喻周世侯伯歷夏及商所來者遠也其以
瓜瓞小大作詰者鑒

周原膴膴堇荼如飴

毛傳云堇菜也茶苦菜也鄭箋云周之原地膴膴然肥美其所生菜雖有性苦者皆甘如飴也蓋堇卽野芹茶卽苦菜處處有之亦處處食之爾雅釋草云薺苦堇郭注云今堇葵也葉似柳子如米沴食之滑則是堇爲菜名其味苦與茶爲同類孔疏云芟堇草夫芟雖名堇又名烏頭乃藥草中之有大毒者是誤據也堇爲野芹有水陸二種小雅齧沸檻泉言采其芹是爲水芹此云生於周原與茶同詠是爲陸芹夏小正云二月榮堇是堇二月生苗閼左氣寒四月始生葉似蓬本而整其莖青近節處色紫枝多岐細花密簇結子如粟米以其與園芹相似故有芹名蘇氏云堇菜野生非人所種葉似蕓花紫色禮內則云堇蕓粉榆兔蕓蒲澑以滑之鄭注云冬用堇夏用蕓蕓亦

革類謂用之以調和飲食也革性滑似葵故又名革葵郭注云革味苦今所見者其味微辛蘇云革花紫色今所見者其色俱白革可食不異園芹若烏頭乃藥材之下品一名烏喙國策云人之饑所以不食烏喙者以其雖偷充腹而與死同患也烏頭又名奚毒淮南子云天下之物莫凶於奚毒而良醫橐而藏之有所用也烏頭又名雀芋酉陽雜俎言雀芋狀如雀頭飛鳥觸之墜走獸遇之僵陶貞白言以烏頭搗汁敷矢射禽獸十步卽倒烏頭性毒如此雖生周原豈能變哉蓋革茶之味皆苦此地所生味甘如飴故取之以徵土性之美潘安仁閒居賦云革齊甘旨是革亦有甘者不獨周原有甘革矣

柞棫拔矣

鄭箋云柞櫟也棫白桞也柞見車牽棫山木之小者爾雅釋木云棫白桞郭注云小木叢生有刺實如耳璫紫赤可啖此木關左有之木色深黃中心黑赤幹直不曲中有細孔可刻爲杖子大如小錢圓扁

勻淨文理極細俗呼曰扁旦核綫穿成串以供手玩韓保昇云械出
雍州樹生葉細似枸杞而狹長花白子附莖生紫赤色大如五味子
莖多細刺其實五六月熟陸疏云械其材理全白無赤心者爲白櫟
卽柞也夫柞爲大木械爲小木大小懸殊本非一類詩中有單言柞
者如維柞之枝析其柞薪是也有柞械並言者如瑟彼柞械柞械斯
拔是也若械卽爲柞詩中何以分言又連言之械名白櫟械有木質
色白一種而黃質赤心者多不得以白質者當柞也說文械柞二字
不連文亦分釋之許氏不以械柞爲一木柞一名槲一名大葉櫟與
櫟相似又有櫟名而非一種箋以櫟釋柞猶誤

梵梵械樸

毛傳云械白櫟也樸枹木也爾雅釋木云樸枹者郭注云樸屬叢者
爲枹詩所謂械樸枹樸

棡楨濟濟

楳小木山果也見簡兮楳荊之赤者一名紫荊一名雉尾荊世傳肅
慎氏楳矢卽此書禹貢云惟箇箒楳三邦底貢厥名注云楳中矢榦
是以楳爲矢夏后時已有之非周武時始見於貢也陸疏云楳形似
荊而赤莖似蓍上黨織爲斗筲箱器又揉以爲釤故上黨謂問婦人
問欲買楳否曰竈下自有黃土問欲買釤否曰山中自有楳夫楳楳
爲二木皆叢生無大材乾質皆輕幹直可爲杖俗則並呼之曰楳楳
藉

鶯飛戾天魚躍于淵

鶯羽蟲魚水蟲鶯見采芑

瑟彼柞棫民所燎矣

柞棫木名柞見車輿棫見綠

莫莫葛藟施于條枚

葛藟蔓草名葛見葛覃藟見樛木

修之平之其灌其櫟

毛傳云柂櫟也與爾雅釋木文同郭注云柂樹似柂櫟而小子如細栗江東呼爲柂栗陸疏云柂葉如榆木理堅韌而赤可爲車轅李氏本草云栗有數種其大如指頂者爾雅所言柂栗也是栗爲果實木亦美材故與灌木修平之不與蓄翳爲伍盡事芟除也

啓之辟之其檉其椐

毛傳云檉河柳也椐檉也陸疏云檉河柳生水傍皮正赤如絳一名兩師枝葉似松椐檉節中腫似扶老今靈壽是也宏農共北山甚有之爾雅釋木云檉河柳椐檉郭注云檉今水傍赤莖小楊椐腫節可以爲杖詩疏廣要云檉非獨知兩又能負霜雪天寒不凋有異餘柳李氏本草云檉柳小幹弱枝插之易生赤皮細葉如絲嫋娜可愛一年三次作花花穗長三四寸水紅色如蓼花南齊時益州獻蜀柳條長狀若絲樓者即此木也椐一名檉陸氏以爲靈壽漢書孔光傳賜

太師靈壽杖孟康注以爲扶老杖服虔注云靈壽木似竹有枝節長不過八九尺圍三四寸自然有合杖制不須削治也陳藏器言椐生劍南山谷在今之蜀地關左未見此木檉則處處皆有不生河畔多植於園圃以供玩賞榦正赤皚而不光澤長條岐出葉似邪蒿而細花似水蓼而促北地嚴寒經冬落葉不耐霜雪酉陽雜俎言涼州有赤白檉今惟有赤檉無白色者南都賦言檉似柏而香檉脂曰檉乳今所見者殊無香氣而亦不見有脂爾雅翼云檉名雨師天將雨檉先起氣以迎之故名梁江淹檉頌云本貴冬榮檉實寒色南方地暖始然也本草衍義名檉曰三春柳今訛曰三川柳又呼爲觀音柳

攘之剔之其檉其柘

毛傳云檉山桑也柘無注爾雅釋木云檉桑山桑柘亦無文說文云檉山桑有點文者柘柘桑是檉柘皆木名爲桑之別種檉爲山桑枝

榦與園桑相似薄葉而小葉多梗似花叢生無大木飼蠶最宜絲名
繅絲書禹貢曰厥篚壓絲繅桑條長條皮上有白斑點桑椹最繁繅
繆盈枝熟可食柘與山桑枝葉畧同惟枝上有刺葉上有毛爲異葉
亦薄有岐枝亦可飼蠶漢書五行志云周宣王時童晉曰檻弧箕服
服虔注曰檻繅桑也顏師古注曰檻山桑之有點文者埤雅云柘宜
山石李氏本草云柘喜叢生榦疎而直蠶書云柘葉飼蠶爲絲中瑟
琴絃清響勝凡絲考工記云弓人取材以柘爲上其實狀如桑子而
圓粒如椒名佳子禮月令季春之月命野虞毋伐桑柘周禮夏官司
爟變國火以救時疾注云夏取桑柘之火漢書揚雄傳云不奪百姓
膏腴穀土桑柘之地是柘爲桑類古則與桑並重也關左呼墮曰野
桑呼柘曰刺桑

柞棫斯拔

柞棫木名柞見車韋棫見縣

松柏斯兌

松柏大木名松見山有扶蘇柏亦松類而與松異爾雅釋木云柏桷
是桷爲柏之別名桷一作鞠說文云柏鞠也六書精蘊云柏陰木也
木皆屬陽而柏向陰指西蓋木之有貞者故字從白白西方正色也
李氏本草說畧同埤雅云柏之指西猶針之指南也夫柏之種類無
多藥材所需惟取葉扁側生者名側柏處處可植其榦直上高入雲
表木性緩細絲理雕刻爲器永無裂紋葉密成片冬寒不凋開小黃
細花結子如山楂形色青有皺紋霜後自裂每顆中有四五子似牛
蒡子剝取仁芳芬可食俗呼曰片松子仁曰柏子仁枝榦四出未嘗
專一指西陸氏以針之指南爲比驗之當前柏桷殊不然也

麛鹿攸伏

鹿山獸麛鹿之牝者見吉日

鼈鼓逢逢

毛傳云鼈魚屬陸疏云鼈形似蜥蜴四足長丈餘其皮堅厚可以冒鼓說文云鼈水蟲似蜥易長丈所續博物志云鼈長一丈其聲似鼓埤雅云鼈鳴應更吳越謂之鼈更又鼈欲雨則鳴里俗以鼈讖兩禮月令季夏之月命漁師取鼈漢書馬融廣成頌云左挈夔龍右提蛟鼈司馬相如上林賦云樹靈鼈之鼓是古冒鼓多以鼈皮爲之或云鼓聲逢象鼈鳴

豐水有芑

毛傳云芑草也詩之言芑者有三蓋三物而同名一芑穀一芑菜一芑草薄言采芑之芑傳以爲菜卽今之苦蕡維糜維芑之芑傳以爲白苗卽穀中之白穄蜀黍此芑傳以爲草生於水畔是水草詩緝以此爲穀與傳異夫蜀黍非水穀此言有於豐水非穀類也

蓺之荏菽

毛傳云荏菽戎菽也鄭箋云戎菽大豆也爾雅釋草云戎菽謂之荏

菽孔疏云樊光舍人李巡皆以戎菽爲今胡豆郭璞言春秋齊人來獻戎菽管子言北伐山戎出冬葱及戎菽布之天下今之胡豆是也郭氏等以戎胡俱夷名故以戎菽爲胡豆后稷種穀不應舍中國之所種者何時絕其種乎而齊桓復布之禮有戎車不可謂之胡車明戎菽正大豆是也羣芳譜云豌豆一名胡豆一名戎菽一名青斑豆一名回鶻豆一名彈豆一名淮豆一名國豆種出西北土甚多八九月下種亦有春種者苗生柔弱宛宛然故有是名蔓生有鬚葉似蒺藜兩兩相對嫩時可食三四月開白花如蛾形結莢長寸許子圓如丸可炒食此豆處處有之今俗惟呼曰豌豆字亦作躉李氏本草云豌豆百穀中最先登嫩時青色老則斑麻故有青斑麻累諸名此物其用最廣烹其嫩莢爲菜煮其青莢代穀磨之爲麵作餅無不宜者爾雅釋詁曰戎大也鄭箋訓戎爲大本此解戎爲胡泥矣

麻麥穀糠瓜瓞唪唪

麻麥穀名瓜瓞蘆屬俱見前

維秬維秠維糜維芑

毛傳云秬黑黍也秠一稃二米也糜赤苗也芑白苗也爾雅釋草云秬黑黍秠一稃二米葵赤苗芑白苗郭注云詩曰維秬維秠亦黑黍但中米異耳蓋今之赤粱粟芑今之白粱粟皆好穀是皆以秬秠爲黍糜芑爲粟黍性黏俗呼曰秬子粟性不黏俗呼曰穀子黍米名黃米粟米名小米陸德明釋文云秬今蜀黍也蓋蜀黍今名高粱一名蘆穄一名蘆粟廣雅名荻粟又名木稷其莖數寸一節一節一葉與蘆荻相似故有蘆荻名其名粟名稷者高粱大於粟稷莖葉亦密粟稷相似故兼有其名猶之名蜀黍也邵晉涵爾雅正義云李巡言黑黍一名秬說文言秬黑黍一稃二米以釀也或作秬秠一稃二米天賜后稷之嘉穀也前人誤以稷爲黍遂不能辨秬秠因有疑爲古

之異種後世所不經見者今以人所爲曉者分晰言之稷者北方所謂小米黍者北方所謂高粱也鄭注月令云黍秀舒散屬火素問金匱真言論云南方赤色其穀黍王疋注云黍赤色又云中央黃色其穀稷注云色黃而味甘也今小米色黃而高粱色赤夫人而知之不待辨而明也黍爲高粱以種植之時驗之夏小正云二月往耰黍禪禪單也五月初昏大火中大火者心也心中種黍菽糜時也今高粱布種南方在三四月間北方則早者二月遲者不過五月尚書大傳淮南子說苑俱云大火種黍菽糜據其最後者言小正則兼該始終是小正所謂黍卽高粱也以種植之地驗之荊揚宜稻故南方雖種高粱不甚以爲重雍冀宜黍稷幽州宜三種謂黍稷稻故北方高粱之種最廣今直北屬國在古雲中郡境外不殖他穀惟種高粱孟子所謂惟黍生之也蓋其地解凍遲而降霜早高粱以暑月種幹葉既成霜早不害歲收爲糧此孟子所謂黍卽高粱也又以物性及施於

用者驗之說文云黍禾屬而黏者也以大暑而種故謂之黍孔子曰
黍可爲酒禾入水也今高粱有秗稭二種南方種者皆秗而植穗北
方兼二種或穗垂似禾南方以爲粢餌而北方之寢者爲飯及糜而
其性皆黏故云禾屬而黏者也後世釀酒者稭稻大麥小米爲最著
而說文獨舉黍者稻麥稷雖可釀酒而以食爲主高粱雖亦爲飯而
以釀酒爲主故獨於黍曰可爲酒是說文以黍爲高粱也再以俗謬
所稱者證之釋文以黑黍爲蜀黍食物本草云高粱一名蜀黍案大
者爲蜀本於雅訓今高粱亦有短小者而大率皆高大是黍其本名
蜀言其大也四方殊語則北方曰高粱浙人呼之曰粟亦曰蘆穄皆
假借爲名而山東謂之黍黍山西曰蕡黍福建於短小者呼之曰黍
此雖不可爲典要亦可見黍之名未盡亡也學者誤以黍爲小米則
無以解於秬秠因博會牽合以秬爲小米中黑色者然小米偶有黑
色非常種也況夫秬所以釀酒即使秬爲小米則今釀小米爲酒者

率用黃色之米未聞擇取其黑也至於秌爲一秤二米則小米實無此種不得不神奇其說疑爲古嘗有之後世所不經見夫詩言嘉種皆陳常時夏粒食無疆奚取於世不經見者爾雅又奚取而釋其名狀以示異於人哉陸德明知稷之不可以冒黍也故秬云今蜀黍也米白穀黑今高粱成熟外有黑稃稃內米赤間有白者陸氏蓋得之目驗非臆說也一秤二米不特小米無此種亦爲他穀所無惟高粱有之南北種高粱者皆習覩之不以爲異也然則秬秌爲黍卽高粱無可疑矣或疑今高粱酒其性酷烈必非古之秬鬯然今北方富室有釀高粱爲黃酒者功用加倍故不常釀釀成之後其味芳醇古者以共宗廟之祭詩書言秬鬯一卣以昭恩禮之隆則亦非常用之酒矣夫先儒注疏皆以秬秌爲黍皆以粟之性黏者爲黍以糜芑爲粟以秬爲高粱始於陸氏邵氏旁引廣取證秬爲高粱並秌亦爲高粱他穀無此種其識可謂卓矣試爲細繹此詩麻麥黃茂已述於前

此章蓋言初得之穀特曰嘉種其類不一名之曰秬曰秌曰芑也蓋以南北之地所種之穀總計之南方田溼宜稻北方田高宜粱麥豆之屬亦種而不如稻梁維多后稷教稼正在雍冀之域是宜高粱之地不宜舍高粱而重黍也黍爲處處常種之穀而實爲所不能多種之穀高粱在北方種者居其大半是嘉種之宜爲高粱一也魯頌閟宮詩云俾民稼穡有稷有黍有稻有秬秬與稻不與黍稷並言是秬非黍明矣稻宜於水秬宜於陸穀類雖繁他穀之大小相差無多惟高粱則獨巨以比他穀或大至一倍或大至二三倍秬字從巨言其大於衆穀也此嘉種之宜爲高粱二也郭注爾雅言糜爲赤粱芑爲白粱則糜芑亦宜爲高粱粟有白者無赤者而高粱俗曰紅粱則赤者尤廣名爲粱是高粱之名猶存此一線也黃鳥之詩首章言無啄我粟次章言無啄我梁粟粱分出則粱必非粟古之高粱或名爲黍或名爲粟或名爲稷蓋高粱爲穀種類最多其稃黑白赤黃色

色俱備五方各以其類似者呼之故名不一此嘉種之宜爲高粱三
也高粱結穗有直立者如粟粒之繁密有下垂者似黍顆之疏稀一
秤二米他穀所無惟高粱始有名之曰秌字從禾丕丕亦大也言其
一秤二米又較他穀獨大也此嘉種之宜爲高粱四也高粱在北方
三月播種八月刈穫小正言二月耰黍正應其候若彼似稷之黍而
性黏者則種於五月穫於七月北方晚寒早孟子言惟黍生之是
黏黍非蜀黍也粟稻之黏者皆可釀酒而蜀黍之不黏者亦可造酒
他穀之酒則用釀高粱之酒則用燒今之燒酒其味辛香高粱之黏
者亦可釀酒而用之者惟燒酒則盛行之關左高粱種之者多收成
亦廣土俗養生全倚此穀然用以燒酒消耗過半邵氏言高粱主釀
酒不虛也然此酒則燒之非釀也高粱之類熟有早晚然相差不過
一月許春種秋收處處皆然說文言大暑始種邵氏言不畏霜寒皆
非目覩之言也高粱之實惟有紅白二色其秤則具五色其高大者

至丈餘小者亦有五六尺其稈皆大一圍非他穀比所以曰秬曰秠
實紅者色如赭實白者色如粉所以曰糜曰芑莖葉根穗皆似黍故
名黍以其大於黍故加蜀以別之是糜爲赤粒蜀黍爲白粒蜀黍
秬爲黑秬蜀黍秠爲一秬二米之蜀黍似稷而黏者爲小黍高粱爲
大黍陸氏釋文今之蜀黍一語可以發千古之謬矣

取蕭祭脂

蕭香蒿也見采葛

敦彼行葦牛羊勿踐履

葦葭蘆也孔疏云葦初生爲葭此禁牛羊勿踐則是春夏時事此爰
其爲人用人之所用在於成葦故以成形名之

黃耆台背

爾雅釋詁台作鯿蓋魚名也毛傳云鯿背大老也鄭箋云台之言鯿
也大老則背有鯿文孔疏云老人氣衰皮膚消瘠背若鯿魚也揚子

方言云鮀老也秦晉之郊陳充之會曰耆鮀言背皮如鮀魚釋名曰
九十曰鮀背背有鮀文也張景陽七命云萊黃之鮀注曰鮀海魚也
漢書東萊郡有黃縣夫黃縣漢屬東萊今隸登州山東省極東之地
南北東三面臨海故有鮀魚此魚大盈尺無鱗皮色青黑而有黃白
斑文頗肖老人顏色俗名鮀鰐

鳥鷺在涇

毛傳云鳧水鳥也鷺鳧屬孔氏陸氏皆引蒼頡解詁以鷺爲鷗埤雅
云鳧好沒鷺好浮李氏本草云鷗者浮水上輕盈如鶴也一名水鷄
江海湖泊皆有之鷗說文作鷙云水鷄也正字通云鷺蒼黑色羣飛
鳴隨潮往來風起輒飛至岸渡海者以爲候關左爲近海之區水鳥
頗繁其有蒼白羽色如鵠者人目曰鷗又呼曰海貓離騷云駟玉虬
以乘鷺兮王逸注云鷺鳳凰別名非此詩之鷺也

鳳凰于飛翹翹其羽

毛傳云鳳凰靈鳥仁瑞也雄曰鳳雌曰凰爾雅釋鳥云鵠鳳其雌鳳
郭注云瑞應鳥高六尺許陸疏云鳳凰其雛爲鷺鷥非梧桐不棲非
竹實不食說文云鳳神鳥也天老曰鳳之像也摩前鹿後蛇頸魚尾
龍文龜背燕領雞喙五色備舉出於東方君子之國翱翔四海之外
廣雅云鳳凰首文曰德翼文曰順背文義腹文信膺文仁雄鳴曰卽
卽雌鳴曰足足昏鳴曰固常晨鳴曰發明晝鳴曰保長畢鳴曰上翔
集鳴曰歸昌漢書昭帝始元三年鳳凰集東海宣帝本始元年鳳凰
集膠東四年鳳凰集北海地節二年鳳凰集魯郡羣鳥從之神爵四
年冬十月鳳皇集杜陵十二月鳳皇集上林嚴延年傳云黃霸在潁
川以寬恕爲治鳳凰下上賢之光武帝十七年有五鳳皇見於潁川
之鄉縣東觀記曰鳳高八尺五彩羣鳥並從行列蓋地數頃章帝元
和二年鳳皇集肥城詔曰鳳皇黃龍鸞鳥比集七郡注云鸞鳥者赤
神之精鳳皇之佐雞身赤毛色亦被五彩鳴中五音夫鳳爲罕見之

鳥太平之世應瑞而出黃帝時鳳凰巢阿閣周文王時鳳鳴岐山其爲祥禽自古至今言無或異前漢昭宣之世鳳凰屢見後漢世祖章帝之年鳳亦來集彼時漢祚中興祥瑞屢臻理固宜然至於安帝政由鄧后紀綱墜矣延光三年鳳見濟南當此災異頻書之候而猶有鳳名之曰祥人不敢信吳任臣注山海經於是謬其說云鳳有五爲瑞者一爲孽者四皆似鳳並爲妖一鶠鶠二發明三焦明四幽昌是鳳不爲祥鳥轉爲孽蟲矣此詩以鳳凰之集喻吉士之多意以得人爲瑞不專取夫鳳翫也

梧桐生矣于彼朝陽

毛傳云梧桐柔木也山東曰朝陽梧桐不生山岡太平而後生朝陽瑞應圖云王者任用賢良則梧桐生於東廂遁甲書梧桐可知月正間歲生十二葉每邊六葉從下數一葉爲一月有閏則十三葉視葉小處則知閏何月立秋之日至期一葉先墜羣芳譜云梧桐一名青

桐一名櫟皮青如翠葉缺如花人家齋閣多種之其木無節直生理細而性緊四月開花嫩黃如小棗花五六月結子莢長三寸許五片合成老則開裂如箕名曰棗鄂子埠雅云棗鄂子皆五其子似乳緣其上柔木也風俗通云梧桐生嶧陽山巖石之上采東南孫枝爲琴聲清雅蓋桐有青白二種以其皮色分之梧桐爲青桐爾雅所謂櫟梧是也榮爲白桐與梧桐小異梧桐葉較白桐差小開白花五出花子如珠垂莢外淮南子云梧桐斷角注云柔勝剛也夫木片斷角不止梧桐爲然凡柔木皆可用嘗以楊柳木片鋸牛之角誠驗

如蜩如螗

毛傳云蜩蟬也螗蝘也此言蜩名蟬螗名蝘下句如沸如羹言如羹之沸沸羹非二物蜩螗亦不宜爲二物傳於幽詩五月鳴蜩注云蜩螗也小雅鳴蜩嘒嘒注云蜩蟬也毛蓋未嘗分蜩螗爲二物也爾雅釋蟲云蜩螗郭注云蜩螗者蝘俗呼爲胡蟬江南謂之螗螗則是蜩

螗又名蝘蜎卽是螗爾雅郭注又可證也楊氏方言云蟬楚謂之蜩宋衛之間謂之螗蜩陳鄭之間謂之蝘蜎秦晉之間謂之蟬海岱之間謂之蜩今禮月令出於呂覽呂不韋書著於秦地仲夏之月言蟬始鳴孟秋之月言寒蟬鳴方言秦晉爲蟬一語固與月令巧合矣然考鄭氏詩譜蕩詩作於厲王之世是詩作時周未東遷周猶居於秦地則已謂之蜩螗矣揚氏之說可盡信哉陸疏言螗爲蟬之大而黑色者一名蝘蜎一名蜩螗青徐謂之蝘蜎楚人謂之螗螗秦燕謂之蟛蜞前漢書五行志引此詩句顏師古注云螗螗也卽蜩螗也然北方諸省則通呼爲寒蟬餘名則未聞有呼者

投我以桃報之以李

桃李木果名桃見桃夭李見何彼穠矣

菀彼桑柔

桑木名見定之方中

降此蟊賊稼穡卒痒

蟊賊害稼蟲見大田

瞻彼中林甡甡其鹿

鹿山獸名見野有死麕

寧爲荼毒

荼草名詩中所載之荼有四谷風誰謂荼苦則苦菜也東門有女如荼則茅華也良耜以薅荼蓼則委葉也皆言荼毒是草之有毒者入藥名澤漆關左俗呼爲貓兒眼鄉人取此草莖根華葉搗爛投於川澤毒魚大小盡死荼毒生靈此物爲最澤漆生於山原處處俱有俗名亦同人人皆識若苦菜乃可食之物豈有毒哉如曰荼苦殺蟲故曰毒此詩上文明言爲民未言爲蟲書湯誥弗忍荼毒亦言虐萬方百姓李華弔古戰場文荼毒生靈萬里朱殷皆言毒人若苦菜爲常食野蔬不能毒人伊誰弗知豈可以其殺蟲指爲有毒之草乎夫橫

榔殺蛇百部殺蟲芸香殺蠱柏葉殺蟆皆不言其有毒奈何以毒加茶况茶可殺蟲亦未聞其所殺爲何蟲儒者解經每於解不去者隨意杜撰豈知其一往難通哉澤漆四月生苗葉似豌豆而厚濃綠繁脆斷之有黃白汁中抽高莖再生旁枝五月開花圓小深黃頗似貓眼俗蓋象形名之其汁著人皮膚立時紅腫痛不可忍須急洗去其毒最烈此草多生於磽土沃田中極少諺云好地不生貓兒眼好兒好女不用管斯言信矣

魚鼈鮮魚

鼈水中介蟲見六月

維筍及蒲

毛傳云蒲蒲蒻也鄭箋云筍竹萌也蒲深蒲也孔疏云醯人加豆之實有深蒲筍蘡是菹有筍有蒲也爾雅釋草云筍竹萌說文云筍竹胎也陸疏云筍四月生惟巴竹筍八九月生始出地長數寸鬻以苦

酒或汁浸之可以就酒及食唐書百官志云司竹監掌植竹葦歲以筍供尚食本草云竹有雄雌雌者多筍於竹根行鞭時掘取嫩者謂之鞭筍冬月掘大竹根下未出土者爲冬筍並可鮮食爲珍品南淡乾者爲玉版筍鹽曝者爲鹽筍蒲香蒲其萌可食與筍同貴見澤陂

鮒鰣甫甫

鮒鰣魚名鮒見汝墳鰣見敝笱

麇鹿噭噭

麇鹿山獸名麇見吉日鹿見野有死麕

有熊有羆

熊羆野獸名見斯干

有貓有虎

毛傳云貓似虎而淺毛者也爾雅釋獸云虎竊毛謂之號貓郭注云竊淺也此蓋言虎毛色淺者曰貓虎之毛色本異闢左所見惟青黃

二色毛色淺者亦有之無貓名

獻其貔皮赤豹黃羆

毛傳云貔猛獸也爾雅釋獸云貔白狐其子穀郭注云貔一名執夷虎豹之屬陸疏云貔似虎或曰似熊遼東人謂之白熊豹赤豹毛赤而文黑謂之赤豹毛白而文黑謂之白豹夫貔有狐名而非狐類其皮似狐其形似豹豹亦虎屬而形異於虎虎形似狸豹形似犬書牧誓云如虎如貔禮曲禮云前有羣獸則載貔貅貔與虎並言又與貅並言則貔洵爲猛獸矣豹之白者名貘而貘實非豹郭氏爾雅注云貘似熊小頭卑腳黑白駁能舐食銅鐵豹之爲物不似此也豹亦羣獸詩言羔裘豹飾易言君子豹變是豹之皮可貴而其皮又以文爲貴也說文云貔豹屬豹似虎圓文是豹類於虎貔類於豹史記五帝紀云教熊羆貔貅驅虎以與炎帝戰於阪泉涿鹿之野注云六君猛獸可以教戰貔與諸獸爲伍則貔非狐可知雖郭氏言貔虎豹屬陸

氏言貔熊羆屬說有參差而其爲猛獸則一也廣雅以貔爲狸貓此蓋以貔名白狐故誤爲同類究之貔爲豹屬不似狸也豹之毛色多白爾雅翼言屠州有黑豹洞冥記言浪坂之山出青豹色如翠正字通言豹狀似虎而小白面毛赤黃文黑如錢圈中五圈左右各四者曰金錢豹文如艾葉者曰艾葉豹又西域有文如金線者曰金線豹蓋虎之毛色青黃豹之毛色白黑是其常也貔之白豹之赤黑之黃是以罕見之毛色爲獻也

秬鬯一卣

毛傳云秬黑黍也鬯香草也築煮合而鬯之曰鬯鄭箋云秬鬯黑黍酒也謂之鬯者芬香條鬯也夫傳以鬯爲草而箋以鬯爲酒蓋以香草雜於米中釀酒至酒已熟惟見酒不見草傳於釀初言箋於釀後言之也說文云鬯芳草也一曰鬯鬯以秬釀鬯草芬芳攸服以降神也書洛誥以秬鬯二卣曰明禋傳云黑黍曰秬釀以鬯草是鬯爲

鬱草釀成今以白芷當歸菊花木瓜制麴猶其遺意鬱卽藥材中之鬱金色深黃味香又名鬱金香

蟲賊蟲疾

蟲賊害苗蟲見大田

爲梟爲鴟

鄭箋云梟鴟惡聲之鳥漢書谷永傳引此詩句顏師古注云幽王以哲婦爲美實乃爲梟鴟也梟鴟惡聲之鳥故以喻焉山陰陸氏云梟不孝鳥也梟食母破獍食父夫梟爲土梟俗呼貓兒頭見墓門鴟一作雉說文云雉鵠也大如鷹鵠蒼色隱有斑文圓目鈎喙爪能攫物段氏說文注云鴟今江蘇俗呼曰鴟鷺盤旋空中攫雞子食飽照蕪城賦云寒鴟嘯雉莊子云鴟得腐鼠皆此物也蛇蛙魚蟹及人所棄自死之畜鴟皆啄食兼食豕犬之糞貪而且穢無如此鳥是其形惡其性惡不獨其聲惡矣爾雅有鴟鴟茅鴟怪鴟皆與單言鴟爲各物

蓋鴟鳴其音鴟鴟然故名鴟山左人猶呼爲老阿鴟關左呼爲老鵠
子

毛詩多識卷十一終

毛詩多識卷十二

長白多隆阿著

周頌

貽我來牟

毛傳云來牟麥也廣雅來作麌牟作夢注云麌小麥麥大麥漢書劉向傳來牟作釐韓釐來古通字釐爲牟之本字羣芳譜云小麥名來苗生如韭成似稻高二三尺實居殼中芒生殼上生青熟黃秋種夏熟具四時中和之氣亦可春種至夏便收然不及秋種者說文云麥屬金金旺而生火旺而死牟大麥也莖葉與小麥相似芒長殼與粒相黏未易脫小麥磨麪作餅餌食大麥止堪碾米作粥飯用及飼馬用此其所以異也漢書武帝元狩三年遣謁者勸有水災郡種宿麥顏師古注云秋冬種之經歲乃熟故云宿麥夫大小二麥釀酒造麴用者尤多小麥有秋種者名冬麥其於春種者名春麥冬麥性微平

春麥性熱本草言小麥有毒惟蘿蔔可解二麥皆有芒大麥之芒尤
大麥之殼有色黑者名烏麥種於二月穫於六月禮月令孟夏之月
麥秋至關左節氣不能然也

振鷺于飛于彼西離

毛傳云鷺白鳥也夫鷺古名鷺鷺又名絲禽偃海錄云一名帶絲此
以其羽毛細長蕤蕤如絲故有絲名又因其色白名白鷺又名雪客
亦言其色白如雪也楚威王時有朱鷺合沓飛翔而來舞舊鼓吹朱
鷺曲是也是鷺有赤色者然赤鷺不常有常有者色皆白故傳訓爲
白鳥亦有蒼灰色嘗於水澤見之爾雅釋鳥云鷺春鉏郭注云白鷺
也頭翅背上皆有長翰毛今江東取以爲睫襯名之曰白鷺綾李氏
本草云禽經言鷺飛則霜鷺飛則露其名以此步於淺水好自低昂
如春如鉏之狀故曰春鉏林棲水食羣飛成序潔白如雪一名屬玉
陸疏云鷺水鳥也好而潔白青齊之間謂之春鉏遼東樂浪吳揚人

皆謂之曰白鷺此鳥頸細而長腳青善翹高尺餘短尾長喙頭上有毛數十莖長細如絲將欲取魚則弭之蓋鷺羽絲長可愛故古人取以飾翹陳風宛丘言值其鷺翹是也古者以鷺飾鼓隋書樂志言鼓柄翔鷺其上是也夫鷺柄鼓上必有取義或曰鷺爲鼓精云

豐年多黍多稌

毛傳云稌稻也爾雅釋草云稌稻郭注云今沛國呼稌夫稻爲五穀之一五方皆有下溼地皆可種江以南多種水稻河之北多種陸稻呼稌者少間呼曰稻惟呼曰粳米名白米或名大米或名老米三月布種八月熟其莖葉似小麥穗實似大麥實皮粗澀黃稃者多亦有赤稃黑稃者稃內之皮或赤或白皮赤者溫皮白者涼黏者名糯香者名秔皆美穀也

有鱠有鰋鰐鰕鯶

鄭箋云鮓大鯶也鮓略也鮓白鱠也鰐鮎也羅願云鮓其形纖細而

白故名白鱺又名白鯈淮南子云不得其道者若觀條魚注云條魚
小魚正字通云鰻呼參條魚長而小時浮水面性好遊故名本草云
脩江河中之小魚也性喜浮故荀子以爲浮陽之魚此魚好作水上
遊莊子觀於濠梁言脩魚出游從容以爲魚樂也潘岳閒居賦云玩
脩魚之激激注云澈澈遊貌也凡近山溪之水多鰻魚大者長三寸
餘體狹而扁似柳葉形鱗細潔白好羣遊貪餌易釣雄者譽尾色紅
鱗微綠俗呼爲紅翅魚雌者色白如銀俗呼爲白漂魚山陰陸氏言
鱸似鰻而色白鱺本白鱺而形迥不似鰻此由鱸鰻連文而誤爲一
類山海經北山篇言彭水脩魚其狀如雞而赤毛三尾六足四首其
音如鵠夫此經多誌怪物最難信玉篇以之釋鱸則尤誤鱸爲秦黃
鮋爲鯀鰻爲昂刺鰻爲白魚鱸非鮀鮋非鯉鮋鮋見碩人餘見魚

麗

莫予井蜂自求辛螫

蜂飛蟲一作蠭又作螽爾雅釋蟲云土蠭木蠭郭注土蠭云今江東大蠭在地中作房者啖其子卽馬蠭注木蠭云今莉巴間呼爲蠭其似蠭而小在樹上作房又食其子夫言啖其子食其子者蓋言蜂之子初生如蛹未生頭足色潔白可啖食也說文云蜂飛蟲螯人者李氏本草云宣歙人好食蜂兒山林間大蜂結房土人採時著草衣蔽身以捍其毒螯復以烟火薰去蜂母乃敢攀援崖木斷其蒂一房蜂兒五六斗至一石揀狀如蠶蛹榮白者以鹽炒暴乾房中蜂翅足已成則不堪用此言取蜂之法曲折詳明是天下實有食蜂之地禮內則言爵鷗鷗范皆入食品范卽蜂也是食蜂自古已然也爾雅翼云蜂類自多其黃色細腰者謂之稱蜂又蜜蜂人取而養之一日兩出而聚鳴號爲兩衙其出采花者取花鬚上粉置兩餌或采而無所得經宿不敢歸房中關左所見之蜂亦有十餘種多不能名爾雅所言木蜂其色黃而黑大如蠍蟻齧木屑作窩居樹叢中俗名大麻蜂爾

雅所言土蜂色黑微黃大如天牛穴地作窩毒螯牛馬至死飛聲薨
薨然俗名地雷蜂其居草中比他蜂差小名草蜂其釀蜜者比青蠅
微大名蜜蜂其在房檐下齧紙作窩似蓮蓬倒垂數十爲羣者名黃
蜂其負蜘蛛處竹管及銜土作房者名細腰蜂尾端皆有刺螫人被
蜂螫者取蚯蚓糞搽之可解坤雅云蜂其毒在尾垂穎如鋒故謂之
蜂本作遙或作蠻又作螽

肇允彼桃蟲拚飛維鳥

毛傳云桃蟲鵠也鳥之始小終大者鄭箋云鵠之所謂鳥題肩也或
曰鴟皆惡聲之鳥孔疏云題肩是鵠之別名與鴟不類鴟自惡聲之
鳥鷹非惡聲不得曰皆惡聲也說文云鵠鴟桃蟲也郭璞云桃蟲巧
婦也諸儒皆以鵠爲巧婦與題肩又不類今箋以鵠與題肩及鴟三
者爲一其義未詳且言鵠之爲鳥題肩事亦不知所出遺諸後賢爾
雅釋烏云桃蟲鵠其雌鵠郭注云鵠曉桃雀也俗呼爲巧婦小鳥而

生鵠鷩者也陸疏云桃蟲今鶴鷩是也微少於黃雀其雛化而爲鵠故俗語云鶴鷩生鵠夫傳訓桃蟲爲鶴卽鶴鷩也段氏說文注云單呼曰鶴累呼曰鵠鵠鷩謂其小取義於焦眇也方言云自關而東謂之巧雀或謂之女匠自關而西謂之鰻雀或謂之巧女江東謂之桃蟲說苑云鶴鷩巢於葦苕繫之以髮取茅秀爲巢以麻紉之如刺犧然故名犧雀他鳥爲巢或占全樹桃蟲爲巢繫於枝頭一枝已足故莊子云鶴鷩巢於深林不過一枝也爲其累窩性巧故名巧女又名巧婦又名巧雀又名女匠又名工雀爲其羽色微黃又名黃脰雀巧女一名關左至今猶如此呼小如彈丸其伏雛亦如之其巢多繫臨水樹枝形似韓雛良然從未見其始小終大傳說或泥詩義箋又附會傳說而尤誤者夫爾雅廣桃蟲之名則言其名鶴傳以詩言拚飛疑鶴不足以盡其義故言其始小終大箋欲實桃蟲之終大因疑其爲題肩爲鴟郭注爾雅卽直言其生鵠陸氏疏詩又言鵠由於化

輶轉牽引愈誤愈遠人情好異焉知不爲邵注桑扈目觀其盜脂膏
邪張氏云此猶言初爲鼠後爲虎不必謂桃蟲化爲鳥是桃蟲化鷗
之說已有不信之者孔氏亦疑之因未實見此物故不能實指爲非
彼桃蟲非希見之鳥而未見者則不能識毛鄭已誤於前後之學者
不能據孔疏詳加考察如邵注爾雅段注說文仍遵舊說試思桃蟲
之巢大僅盈寸雖化爲鷗其巢何以能容西河毛氏云始因其名桃
蟲則以爲蟲繼見其拚飛則知爲鳥千載之夢至今始白也

未堪家多難子又集于蓼

毛傳云集于蓼言辛苦也說文云蓼辛菜薈虞也爾雅釋草云薈虞
蓼郭注云虞蓼澤蓼邵氏注云蓼有多種舉虞蓼以該其餘也蓼與
蕘古相似而葉稍狹其子謂之蓼實吳氏本草云蓼實一名澤蓼古
者用以調和禮內則云膾秋用蓼又云鵝羹雞羹蓼釀之蓼蓋取其
辛以爲和也其雜生田野間者能害稼故良耜云以蕘荼蓼夫澤蓼

生於水故曰澤良耜言蓼是爲水田陸地不生蓼也蓼種最繁而皆相似王氏羣芳譜所載有青蓼香蓼紫蓼赤蓼馬蓼水蓼木蓼凡七種惟青蓼香蓼水蓼可食水蓼較他蓼差小葉似柳花作長穗淺紅色味辛而苦故傳言辛苦也

有椒其馨

椒小木其實香見椒聊

其餽伊黍

黍穀名稷之黏者見黍離

以薅荼蓼

毛傳云蓼水草也孔疏云蓼是穢草茶亦穢草非苦菜也爾雅釋草云荼委荼郭注云詩云以薅荼蓼王肅云荼陸穢蓼水穢夫茶名委葉僅見爾雅注疏之家皆未詳其形色蓼爲水草生水田中莖葉俱似游龍而小高尺餘寸餘一節一節一葉花淺色微紅作長穗俗名

河蓼茶王氏以爲陸穀爾雅作深從水亦疑爲水草也

魯頌

有驥有皇有驥有黃

毛傳云驥馬白跨曰驥黃白曰皇純黑曰驥黃辟曰黃此以馬之毛色各異而命名驥驥爲黑色皇黃爲黃色爾雅釋畜皇作驥別作驥有驥有驥有辟有驥

毛傳云蒼白雜毛曰驥黃白雜毛曰駵赤黃曰辟蒼駢曰駢孔疏云駢駵二者皆云雜毛是體有二色之毛相間雜辟駢爾雅無文辟爲純赤色上云黃辟曰黃謂黃而微赤此云赤黃曰辟謂赤而微黃駢者黑色之名蒼駢曰駢謂青而微黑今之駢馬也

有驥有駵有驥有雒

毛傳云青驥驥曰驥白馬黑鬣曰駵赤身黑鬣曰駤黑身白鬣曰雒孔疏云驥色有淺深似魚鱗也色有淺深班駁隱鱗今之連錢駢也

驥雔爾雅無明文驥爲赤色若身駁俱赤則駢馬故赤身黑駁曰驥
有駮有駮有驥有魚

毛傳云陰白雜毛曰駮形白雜毛曰駮豪駒曰驥二目白曰魚爾雅
釋畜云驥馬黃脊曰驥爾雅音義云驥說文作驥是爾雅之驥卽詩
之驥說文云驥驥馬黃脊與爾雅釋駢正同傳以爲豪駒釋驥駒者
駢也豪駒謂駒上有修豪也與爾雅說文俱異駮爲形白雜毛卽今
之駮白馬俗呼曰砂馬

振振鷺

鷺水鳥赫禽也見振鷺

有駮有駮駮彼乘駮

爾雅釋畜云青駮駮郭注云今之鐵駮也孫炎云色青黑之間

薄采其芹

鄭箋云芹水菜也卽野芹見采菽

薄采其藻

藻水草也見采蘋

薄采其茆

毛傳云茆鳥葵也說文云蓼鳥葵蓋蓼卽古蘿字是茆卽蘿菜蘿亦作蓴蘿字從純純爲絲名則以此草莖細如絲也或呼曰蘿絲陸農師云茆逐水而性滑故亦謂之淳菜陸疏云茆與荇菜相似葉大如手赤圓有肥者著手中滑不得停可以生食又可鬻江南謂之蓴菜或謂之水葵博雅云華茆鳥葵也夫茆有鳥葵名荇亦有鳥葵名名既相同兩草之形亦略同而實非一物毛傳說文皆以鳥葵名茆李氏本草則分鳥葵水葵爲二言荇菜爲鳥葵茆茆爲水葵又名鷺葵以其菜可食如葵也又名馬蹄草以其葉形似馬蹄也羣芳譜云茆一名茆生南方湖澤中最易生種以水淺深爲候水深則莖肥葉少水淺則莖瘦葉多其性逐水而滑惟吳越善食之菜如荇菜而差圓

形似馬蹄柔滑可羹夏月開黃花結實青紫大如棠梨中有細子三四月嫩莖未葉細如釵股黃赤色名稱尊又名雉尾尊體軟味甜五月葉稍舒長者名絲尊九月萌在泥中漸粗硬名瑰尊或作葵尊十月後名猪尊又名龜尊味苦而澀不堪食取汁作羹猶勝他菜干寶云今之鷄蹠草堪爲菹江東有之或名水戾一云今之浮菜卽猪尊是也關左有荇無蕩荇名曰菜關雎詩言采言芼則荇亦可食而俗皆不知亦不名之曰荇但渾呼之曰水草而已茆本可食而古亦貴之周禮天官醢人有茆菹晉書張翰傳翰見秋風起思松江蓴羹鱠命駕歸蓴菜之美可知矣

翶彼飛鴟集于泮林食我桑蠶懷我好音

毛傳云鴟惡聲之鳥也蓮桑實也鄭箋云鴟恆惡鳴今來止於泮水之木上食其桑蠶故改其鳴歸就我以善音此言鴟食桑蠶其音則變好音以鴟言而細玩詩意似言物懷善治鴟懷泮林之好音猶人

之聞仁聲來歸也鑑變鴻音他無依據亦從未聞鴻有別聲也古注之誤多類此

元龜象齒

毛傳云元龜尺二寸蓋龜爲介蟲貴在甲利用卜象爲異獸貴在齒可制器爾雅釋魚云一曰神龜二曰靈龜三曰攝龜四曰寶龜五曰文龜六曰筮龜七曰山龜八曰澤龜九曰水龜十曰火龜是龜有十種而不必皆靈可決吉凶又曰龜三足貴又曰龜俯者靈仰者謝前弇諸果後弇諸猶左倪不類右倪不若此言龜之形不同鄭氏周禮注云天龜元地龜黃東龜青西龜白南龜赤北龜黑此言龜之色不同此詩言元乃龜之大者又曰歟蓋言可用爲卜者書禹謨云昆命于元龜金縢云今我卽命于元龜大誥云王遺我大寶龜易云舍爾靈龜是寶龜靈龜皆有用以爲卜者潘岳秋興賦云龜祀骨於宗祧兮思反身於綠水注引莊子云莊子釣於濮水楚王使二大夫往聘

莊子曰願以竟內累子莊子持竿不願曰吾聞楚有神龜死已三千年矣王巾笥而藏之廟堂之上此龜者死爲留骨而貴乎其生而曳尾泥塗中乎二大夫曰生而曳尾泥塗中莊子曰往矣吾將曳尾於塗中矣此謂可貴者蓋神龜也象出於外國爾雅釋地云南方之美者有梁山之犀象焉漢書張騫傳云身毒國其民乘象以戰顏師古注云象大獸垂鼻長牙李氏本草云象出交廣雲南西域諸國大者身長丈餘高稱之肉倍數牛目纔若豕四足如柱無指而有爪甲其鼻大如臂下垂至地中有小肉爪能拾針芥食物飲水皆以鼻捲入口一身之力皆在於鼻故傷之則死口內有食齒兩吻出兩牙夾鼻長六七尺說文云象南越大獸三年一乳古訓云五年始產六十年骨方足夫君子偕老象之攝也傳言所以摘髮葛屨佩其象攝傳言所以爲飾采薇象弭魚服傳言象弭弓反末也所以解紛也箋言弭弓反末繫者以象骨爲之史記十二諸侯年表云紂爲象箸而箕子

唏是皆以象骨爲器春秋左氏傳云象有齒以焚其身用象骨者所貴在齒也象爲異域之物李氏言其形體最詳亦最確其皮似癩灰色食稻米稻草以其皮爲屑敷金瘡立效

黍稷重穧種稊菽麥

黍稷菽麥皆穀名黍稷見黍離菽見生民麥見思文

有稻有秬

稻稌也見鵠羽秬高粱也見生民

徂來之松新甫之柏

松柏木名松見山有扶蘇柏見皇矣

商頌

天命元鳥降而生商

毛傳云元鳥臯也臯一作乙又作鷗鷕今俗曰燕羽色黑故曰元或曰燕爲水祥故名元元者水之色

陟彼景山松柏丸丸

松柏木也見前

毛詩多識卷十二終

跋

右毛詩多識十二卷清拔貢嶧巖多隆阿所著也其書舊有三本一爲嘉業堂刊本鑄於吳興劉氏校讐極審並有程械林按語文字亦似幾經修正者惜止六卷未爲完璧一爲遼陽張氏排印本乃張繡江之後裔所印卷首卽以繡江名署之較刊本稍遜一爲遼陽袁氏藏書舊鈔本文詞煩冗譌奪最甚今茲所印卽據三本互校擇善而從前六卷以刊本爲主後六卷以排印本爲主其三本並誤則檢所引原書是正之綜觀斯著以辨鳩鳴螽杞爲最精芄蘭桑扈鷩鶻一一釋以俗名尤見博洽惟解唐棣爲楊荼毒之荼爲貓兒眼之類似難徵信至於黍稷糜芑則失之愈遠要之不愧實事求是之作治毛詩者不可不一讀也校勘事竟聊識其顛末並附所見如此後之君子以考覽焉丙子初夏義縣金景芳跋